

JOHANNIS FANTONI  
COMMENTARIOLUM

De quibusdam Aquis Medicatis,

ET

HISTORICA  
DISSERTATIO

De Febris Miliariis.



AUGUSTÆ TAURINORUM

---

EX TYPOGRAPHIA REGIA.  
M. DCCXXXVII.





DE QUIBUSDAM AQUIS  
MEDICATIS  
COMMENTARIOLUM.



Quarum mineralium fontes compluribus in locis scaturiunt, quæ ad Sabaudicam, & Pedemontanam Ditionem pertinent: cujusmodi sunt Aquæ Gratianæ, Maurianenses, Valderianæ, S. Genesii, & Statiellæ; ac super hisce singulis nostrarum observationum specimina in publicum prodierunt. De tribus, quæ restant, præcipuis nunc sermo est, Vinadiensibus, Augustanis, & Anfonensibus; quæ trinæ inter se principiorum natura, & manifestis qualitatibus differunt. Primæ scilicet præcalidæ magna vi sulphuris excellunt: alteræ, paullulum caloris habentes, in Acidulis numerantur: tertiæ prorsus frigidæ, ac ferrugineæ sunt. Ita de Aquis nostratibus, quarum frequentior est usus in mor-

4  
bis, hoc reliquum specimen censendum esse  
tamquam operis complementum videtur .  
Nam alii quidem medicati fontes reperiun-  
tur, ut in Alpino tractu Niciensis Comitatus,  
nempe ad Vicum *Roccabigliera* vulgo nuncu-  
patum; qui modice calidi, & sulphurati esse  
dicuntur, vix aliquantulum falsi: attamen iis  
conservandis curam non adhiberi, neque ad  
eosdem fieri concursum ægrorum accepimus.  
Nonnulla porro in Sabaudicis regionibus præ-  
dicari solent aquæ minerales\*, quarum natu-  
ra, & medicinalis virtus nondum satis explo-  
rata est: aliæque commemorantur antiquitus  
ad balneum usitatæ, sed longi temporis de-  
cursu magis ac magis neglectæ, & denique  
exoletæ: Propterea nihil opus erat, ut de ta-  
libus aquis hoc loco sermonem haberemus .  
Illud utique denunciandum exteris putavimus,  
(quis enim ex nostris hominibus id nesciat?)  
quæ ad Fossanum Balnea valde salubria esse  
affirmat HUBNERUS in altero Geographiæ Uni-  
versalis volumine, nulla omnino ad idem istud  
Pedemontii oppidum inveniri .

#### DE AQUIS

\* Hujusmodi sunt in Sabaudia proprie dicta, non procul  
a Monmeliano, Aquæ vulgo de Ribaud; de la Ferranche;  
de la Rochette: atque in Gebennensi Tractu Aquæ de Men-  
thon, sive de Talloire. Super hisce singulis Taurinum adve-  
tis physica quædam experimenta fecimus. Verum a peri-  
tis viris, qui easdem, & maxime ferrugineas in loco ipso  
diligenter observaverint, idonea documenta expectare licet.

# DE AQUIS VINADIENSIBUS.

**V**INADIUM Cuneensis Provinciæ pagus est, in regione montana positus, a quo millia passuum amplius tria remoti sunt fontes saluberrimi, usque a priscis temporibus cogniti, & Vinadienses denominati. Scilicet a montis radice, ubi convallis est, calidi, & sulphurei prodeunt, quorum alter ceteris calidior, immo fervidus, majoremque sulphuris nidorem exhalans, ligneo canali ad balnearia, & *sudatorium* perducitur: alter minus calens, neque ita palato injucundus, ad potum adhibetur. Pellucidus uterque non acida, nec manifeste falsa, sed una prævalente sulphurea qualitate sensum afficit. Alia insuper aqua præcalida ad eum locum confluit, ubi submersum asservatur lutum; ibidemque lenis ebullitio quædam extrinsecus apparet, subsilientium calidorum etiam fonticulorum indicium, qui lutum ipsum penetraverunt. Reliquas autem scatebras, quarum minimus, ac prope nullus est usus, hic omittendas esse duximus. \*

A 3

Aqua-

\* VIOTTUS de fonte quodam ferrato mentionem facit, † qui ad artus roborandos, ne absoluta curatione redeat arthritis, mirabiliter conferat; idque ab experiente Medico se accepisse scribit. Sed talem, ac tantæ efficacitatis fontem, qui nobis ignotus est, nec priscis temporibus existi-

Aquarum defluentium rivuli mucosas, & pingues inter saxa particulas deponunt: hæc sensim conglutinata in substantiam excrescunt mollem, spongiosam, subviridem, & subflavam, digitum fere crassam, quæ vulgo *muffa* nuncupatur; eandemque ad aliquod non mediocre spatium perfluentes aquæ supereminent. Ejusmodi substantiæ multas portiones, prius in sole siccatas, vir quidam Vinadio redux ad me olim pertulit, quæ valde contractæ, ac tenues erant, virente colore fusco: aliæ ad candelæ lumen admotæ crepitabant, ignescebant, flammulamque, & levem simul odorem sulphuris emittebant, donec penitus exustæ in pauculum, & subnigrum cinerem abirent: alias aquæ communi biduo infusas reliqui; factæ sunt crassiores minimum sexies, putridum quiddam exhalantes; ejusdemque illius putris aquæ unctuosa superficies apparebat. Atque id etiam adnotare libet (tamen si exigui momenti res agitur) experimenta, quæ modo diximus, duodeviginti annis postquam aridæ *muffa* ad meas manus pervenerunt, talem omnino eventum habuisse. Sed nihil profecto in hisce Aquis evidentius, quam copia sulphuris

tuisse arbitramur. Nam ea veterum Medicorum consuetudo fuit, ut opinione potius, quam certis experimentis adducti, metalla quædam, & vires eorum qualescumque medicatis aquis tribuerent.

† V. Opus Auctoris *De Balnear. Nat. & Virib. cap. de Balneis Vinadi.*

phuris, natura fugacis : demersum enim argentum nitidissimum denigrant, cujus tamen color nativus metalli ab eisdem paulum fervefactis, aut soli aliquandiu expositis, non immutatur. Istæ nimirum volubiles in aquis partes sulphureæ facile avolant, & interim iis, in quæ inciderint, corporibus adhærescunt; præsertim vero cum pinguedineis quadam velut affinitate consociari videntur. Ita ex ingenuis viris, qui ad Vinadiensia balnea diu constiterant, quondam audiivi cum dicerent, ova gallinacea igne excocta ad duritiem comedentes, odorem vitelli certe sulphureum se percipere solitos fuisse; id quod aquæ thermalis tribuendum putabant, ad quam potitandi causa accedentes oviparas aves interdum ipsi vidissent. Nam & plures quadrupedes, in primis Rupicapræ, Equi, Boves, admonente siti, ad calentes rivulos, nisi ferveat anni tempestas, adire consueverunt; quin etiam aliqui anhelitu laborantes Equi per assiduum ejusmodi potum sanati esse dicuntur. Homines ibi commorantes etsi ad alium quemcunque usum frigidam adhibere solent, quarum fons limpidus, bibendo suavis, ab ædibus balneariis non longe abest; tamen ad saporis panis confectionem utuntur calidis. Et præcipuam quidem causam, cur aquam thermalem, ut modo diximus, animantes appetant,

in saporem quemdam hujusce laticis subfal-  
sum referendam esse arbitror, quem ipsæ suo  
peculiari gustatu percipiant. Aliquis enim re-  
vera sal inest huic aquæ sulphuræ; quando-  
quidem ejus portio salis per se ab eadem per-  
fluente secedit, ubi finitima inter saxa ter-  
ramque sensim congeritur: ibidem vero per  
æstivos dies recenter sepositum frustra quæsie-  
ris, cujus nempe ab aqua decedentis concre-  
tio brumali tantum, non alio anni tempore,  
perfici potest. Talis igitur concreti salis acer-  
vus cum aliquando mihi allatus esset, ea co-  
pia colligi eundem potuisse minus admirabar;  
quod longo temporis spatio (est enim alpina  
regio illa perdiu frigida) is paullatim accu-  
muletur: cum alioqui paucum in aqua ipsa  
contineri per evaporationem cognoverim:  
nam grana salis quinque, raro sex a libris  
aquæ singulis relinquuntur: eam scilicet igne  
leni evaporandam curavi, quæ ad potum ad-  
hibetur. Albidus hic sal, terræ partibus vix  
ullis admixtus est, sapore quodam instar ci-  
barii salis acuto. Cum acidis liquoribus non  
efferbuit. Aqua communis eo sale satura nul-  
lam inter initia, tum aliquantulam viridita-  
tem syrupo violarum lente induxit. Eadem  
infusa in solutionem sacchari saturni modicum  
quiddam tardissime dejecit: addita vero ad  
solutionem argenti albam illico materiam



coegit, ac deturbavit. Quid plura? concreti falis fragmenta in candentes carbones injecti: admodum illa crepitarunt, ac minutatim diffiluerunt; ut idem propterea sali communi simillimus videatur.

Præter ejusmodi sale, & sulphuris copiam, ceterorum vestigia fossilium in Aquis Vinadiensibus deprehendi minime potuerunt: quamquam RAINAUDUS & nitrum in iis existere, & alumen, & vitriolum firmissime asseveret\*. Ad ipsarum enim scaturiginem facto per heliotropium, itemque per gallam experimento nulla penitus mutatio, vel multis post horis, apparuit: ita ut eadem carere tum aluminoso, tum maxime vitriolico sale videantur. Sediminis autem, quod ab istius laticis evaporatione relinquitur, probe siccati, atque in ignem projecti qualemcumque fremitum pro indicio nitri fortasse RAINAUDUS, & alii quondam Medici habuerunt. Arbitrari quidem licet aquis thermalibus inesse principia quædam subtilissima, & volatilia, ut ideo efficaciores illæ censeantur, quo propius ad fontem bibuntur: sed ea nos elementa perquirimus, & certissima reputamus, quæ sensibus attingi, ac demonstrari possunt. Ceterum unius attenuati sulphuris, totoque latice dif-

fusi.

\* V. Auctoris librum, qui inscribitur *De Bagni di Vinaglio Tratt. 2. cap. 4.*

fusi, & cum illo, quem indicavimus, modico sale confociati, egregia sane virtus est in Thermis Vinadiensibus. Ad solvendos autem lentores, abstergenda atque expurganda viscera qui paulo acriorem medicinam requirunt, hi percommode, ut moris est, marinum salem aquis adjiciunt. Quamquam ipsa hæc vetus, & communis omnium consuetudo minus probanda videtur: cujusvis enim temperamenti simul & morbi ratio habenda est. Scio nonnullis in eum vulgarem modum inchoatam curationem valde molestant fuisse, quæ postea, cum solis iidem aquis, vel addito subinde nitro uterentur, prospere procedebat: nulla jam sitis, dejectiones moderatæ, fluxus urinæ uberrimus. Tametsi aliis e contrario evenisse meminimus, ubi maxime viscerum motrices fibræ torperent, primæque essent corporis viæ lento humore impeditæ: hi primis diebus ignavas & inertes aquas graviter ferentes, deinde admixto eis sale & cibum magis appetebant, & opportune recrementa, magnoque cum levamine expellebant. Nec vero admodum credibile est ejusmodi consuetudinem antiquitus a Medicis inductam fuisse, qui nempe electuaria, pilulas, syrupos, cetera ex officinis medicamentariis petenda in medium protulissent. id potius excogitarum a rusticanis hominibus existimo, qui salem

com-

communem in promptu habere, ac pluris facere soliti sunt; ipsique etiam primi, ut opinor, alpinam, atque desertam regionem illam invisentes, novis ibi fontibus detectis, manifestas eorumdem qualitates curiose observarunt, deinde virtutes ad mala quædam corporis suoapte ingenio exploraverunt. In aliis quibusdam regionibus, præcipue montanis, ubi aquæ calidæ reperiuntur, ex vetusto quoque more tal communis eisdem bibendis admiscetur: quem propterea morem vix mihi dubium est, quin exploratores primi salubrium ipsorum fontium indigenæ ad usum medicinalem simili ratione traduxerint: quemadmodum inter omnes constat, diversi generis remedia, paratu facilia, quæ in variis terræ locis vel incultis atque asperis natura gignit, ab agresti & rustica gente sagaciter inventa esse, utiliterque ad plures morbos adhiberi. Sed redeamus ad vulgarem usum nostrarum thermalium. Ægri curriculum potationis aggrediuntur ducto initio ab aquæ libris ferme duabus; & primo saltem poculo addunt salem marinum cochleari mensura; inde plus bibere, & gradatim pergunt in dies singulos, donec ad summam aquæ dosim pervenerint, octo nimirum, vel decem librarum pondo definitam: tum gradibus pariter ab ea recedentes saccharum plerique

rique substituunt salī: atque hæc spatio novem dierum perfici solet curatio. Summam dosim illam, ut imbecilli homines attingere nec debent, nec facile possunt; sic alii ætate & viribus valentes prætergredi volunt, ita ut ducentas nonnulli, immo trecentas interdum uncias exceßerint. Sed aliqui & diutius, quam consuetudo ferat, & satis copiose bibunt non intermisso stimulo salis. vere enim contumaces quidam morbi efficacem ejusmodi medicinam postulare videntur, si modo hanc ipsam ægroti sine gravi molestia sustinere queant. Memini robustum virum, carnosum & subpingui corporis habitu, quondam ischiade afflictum, postea frequentiori podagra, tum vero etiam continuo cibi fastidio, viscerum obstructione, tibiæ œdemate laborantem, ad Vinadienses Thermas se contulisse: hic bene susceptam curationem ita prosecutus est, ut minime dubitaret longiori tempore pocula permulta quotidie exhaurire, cum perpetua salis additione: commodè per alvum, & renales vias aquæ secedunt; appetitus reviviscit; mala cetera mitescunt: deinde balneo per dies plurimos, tum stillicidio utitur, & luto; nec denique *sudatorium* prætermittit. hisce omnibus ordinatim, strenue, ac toleranter peractis, meliorem admodum valetudinem, hilaris ac lætus

tus in patriam rediit. Altero autem anno, itemque tertio ad Aquas magna fiducia profectus tantum revera ex iis, quantum sperare potuerat, fructum retulit, ut accessiones quoque podagricæ in reliqua ejus ætate rariores essent, multoque mitiores: illuc interea longis intervallis revertebatur, moderato potu contentus: & cum a medio fere Junio, propter conditionem loci, concursus fiat ægrorum ad Balneas; ipse Septembri, cum propitia incideret anni tempestas, ibi est, aquas bibendo, citra incommodum immoratus. Sed generatim curationem sic instituere tutius est, ut desinente Augusto illinc, re omni absoluta, discedatur. Namque in eo tractu aura frigidula vel æstivis mensibus identidem spirat, a qua cavendum est iis maxime, qui balneo utuntur. Ac bene sibi prospiciunt, qui famulatu, & idonea suppellectile instructi privatim domi lavant, quod a communibus lavacris, ob eam causam, reditus in diversorium periculosus sit. Et multo quidem major adhibenda cautio est ab usu vaporarii, ubi præcalida & continua exhalatio efficit, ut brevi tempore totum ægri corpus immodicis sudoribus perfundatur. quamquam enim is bene abstersus, & siccatus placide ac satis in lecto requieverit; si tamen inde e conclavi protinus exeat, gra-

gravem noxam, interveniente aeris intemperie, percipiet. Aduosum profecto & valentissimum id remedii genus est ad rheumatismum, ischiadem, paralytim, articulorum affectiones, ceteras pertinaces, potissimum a frigidis, ut vocant, humoribus progenitas. Atque hæc per viam vaporis curatio paucis diebus peragi solet: altera vero etiam efficax per illutationem longius producitur. Primo quidem ad Vinadienses Thermas, ubi lutum hodie reperitur, ibi nullum fuisse dicitur; postmodum indigenæ sepimentis exstructis in medium concavum spatium idoneam terram deportaverunt: itaque illorum hominum industria mirabiliter ad ipsam se adjunxit naturam: ex tali enim terrena materia, fervidis aquis sulphureis, quo modo diximus, assidue imbuta & satura comparatum est egregiæ virtutis lutum, cujus massam quoque omnem exuberantes aquæ supereminent. Porro ad illud supplendum, quod temporis diuturnitate absumptum in curandis ægrotis, vel casu aliquo dispersum fuerit, interdum eo deferri cujusdam cretæ portionem intellexi olim ex ingenui viri narratione, qui sæpe ad Thermas profectus multam cum balneorum ministris consuetudinem habuerat. Urcumque res sit, explorata jampridem istius luti virtus & plane cognita est, ut nihil opus esse

videatur plures in hunc locum observationes adducere. Sed illam minime prætereundam puto, quæ amplius octoginta ab hinc annis OLAO BORRICHIO renunciata (dum ipse, in Italiam iter faciens, paullum esset in hac urbe commoratus) maxime rara, & commemorabilis visa fuit; adeo ut idem vir doctissimus eam litteris consignatam reliquerit\*: *Marchio*, inquit, *de Pianezza*, *Musarum & Charitum delictum*, *cujus humanitatem & virtutes Augustæ Taurinorum prolixè experius sum*, *longa impotentia dextri brachii afflictus*, *suasû Protophysi Torriani concesserat ad Thermas Vinadienses*, *ibique luto calente in tertium usque mensem quotidie perfrictus a Chirurgo BORELLO*, *in gratiam cum sanitate rediit*, *singulari fricantis etiam Chirurgi emolumento*. *Hic enim postquam triginta tum annis digitum incurvum circumtulisset*, *nullo non frustra adhibito remedio*, *incisis in maximo quodam cum Turcis conflictu tendinibus*; *hic, inquam, dum alii vacat curando*, *sensit paulatim ex limo medicato calorem nativum recreari*; *hinc ultra solitum digitum exporrigi sine dolore*, *tandem plane restitui*, *quem & sanum*, *exporrectumque mihi ostendit*, *sola relicta cicatrice amplissima*. *Hactenus BORRICHIVS*. *Profecto impotentis jamdiu brachii sanatio illa notatu digna est*,  
in

\* V. Medic. Septentrion. Collat. Tom. 2. pag. 855.

in efficaci quidem, sed ad tertium usque  
mensem continuato medicamine posita: id  
quod in plerisque hominibus, & prope om-  
nibus, factu difficillimum; in prænobili, &  
opulento, &, quod longe maximi momenti  
est, sapientia doctrinaque ornatissimo viro fa-  
cile fieri potuit. Ob eam quoque causam,  
videlicet ægroti constantiam in adhibendo re-  
medio, vel eidem ipsi nihil tale opinanti  
Chirurgus prospere evenit: cui lutum octies  
aut decies, ut multorum mos est, affectæ  
parti applicitum vix quicquam profuisset;  
longo autem spatio temporis pedetentim &  
gradatim res ad salutem processit: recreari  
nativus calor cœpit; deinde digitus aliquan-  
tulum exporrigi, qui denique omnino est  
restitutus. Porro id genus morbi adeo inve-  
terati fortuita cûratiô ipsos artis magistros  
docere videtur, quasdam ægritudines natura  
sua, vel diuturnitate quodammodo insanabi-  
les, a congruente remedio patienter, & pla-  
cide administrato, posse aliquando percurari.  
Namque, ad illutationem quod attinet, al-  
terum peccari solet, quod festinanter in cu-  
ratione procedatur; alterum, quod nimis ca-  
lidum lutum usurpetur. Cautissime hi fa-  
ciunt, qui præsertim ab initio temperatum  
imponi laborantibus membris jubent: ac ta-  
le propemodum esse dicitur in fossa limum  
super-



superius; reliquum æstuosum quod ex profundo extrahitur, ita ut a nonnullis vix aut ne vix quidem tolerari queat. Ceterum de sanato digito BORELLI, inter nostrates celebris olim Chirurghi, dubitare quisquam potest, an incisa fuisset in totum pars tendinosa, an vero saltem aliquatenus; id quod multis fortasse vero similius videbitur. Sed quantulacumque demum ista ponatur incisio, ejusmodi certe fuit, quæ post inductam vulneri cicatricem, eamque, notante BORRICHIO, extrinsecus amplissimam, nullo modo aptum ad porrectionem digitum perpetuo reddiderit; ut eidem propterea vis illa movens, unius tandem luti auxilio restituta, singulare quiddam, & admirandum jure optimo reputetur.



## DE AQUIS AUGUSTANIS.

**T**Arantasiæ finitima est Augustani Ducatus regio, ubi Minerales Aquæ scaturiunt, haud procul à Curia Majore; qui pagus ab Augusta Prætoria sexdecim fere miliariis distat. Duæ sunt autem præcipuæ scaturigines, quarum alteri *Victoria*, alteri *Margaritæ* nomen a majoribus nostris impositum fuit.

Aqua *Victoriana* tepens ac limpida est, subsalfo acidulo sapore, quæ statim hausta ex fonte halitum quemdam dicitur, nares titillantem, emittere. Ubi eadem primo excipitur & congeritur, contiguæ terræ ac lapidum superficiem subrufa materia, velut ochra paullum torrefacta, obducit; indeque profluens alia dimittit sedimina, quæ tofaceas albicantes, alicubi subrufas, maximeque cineraceas concreciones efficiunt: sed inter eas aliquæ nativo tuso duriores, & minus cavernosæ sunt. Ab aqua etiam in vasis repositâ diversæ complures particulæ, quasi recrementa, paullatim vi sua decedunt. Etenim in ea, ceteroqui pellucida, quæ anno 1725 circiter medium Augusti ad nos diligentissime perlata fuit, albida passim corpuscula

puscula, flocculorum instar, conspiciebantur :  
cujus aquæ plena cum in loco subterraneo  
lagena diu permanisset, ad hujus fundum,  
& latera frequentes hærebant albidæ ac te-  
nues crustæ, præter majusculas ex eodem ge-  
nere duas, quæ plane subsiderant. Porosæ  
admodum lamellæ hujusmodi omnes acrem  
saporem vix ullum habebant, ac dentibus  
contritæ aliquantum crepitabant. Decennio  
post aqua sub finem Julii mensis recenter  
huc advecta conicum scyphum replevi, aper-  
tumque dies aliquot seposui : facta est in  
summa ejus superficie, perinde ut in aqua  
calcis, pellicula subtilis, quam saporis ex-  
pertem inveni. Sed ipso quoque latice re-  
pletam lagenam cum biennio asservassem  
domi, ac demum apertam in sole æstivo  
collocavissem, paucis post diebus supernatan-  
tia lamellarum segmenta diversæ amplitudi-  
nis apparuerunt. Eamdem hanc aquam una  
cum talibus segmentis, & ceteris excussis,  
quæ vasi affixa erant, percolavi; atque in  
colo chartaceo materia satis multa, terre-  
stris, & prope insulsa remansit.

Omnino autem ex aquis *Victoriani* fontis  
leni igne evaporatis sedimenti scrupulum  
circiter unum pro singulis aquæ libris col-  
ligebam. Ex albidâ id materia constat, acu-  
to sapore; nam salis partem minimum sex-

tam continet, ut habitis per lixivium experimentis cognovi; atque hic a terrea substantia secretus, bene ficcus, multiplici licet charta inclusus, facile humescit. Sali instillatus chalcanthi spiritus lenissimum quendam fermentationis motum excitat, fortasse ob aliquas terræ partes ad salem ipsum, haud penitus expurgatum, adhuc hærentes. Eiusdem solutioni adjecta solutio mercurii sublimati albidum liquorem efficit; additoque saccharo saturni magis albescit liquor; deinde coalescentes albæ particulæ, gravioresque factæ, sedimen in fundo vasis constituunt; ex una vero alteraque gutta solutionis argenti uberior subsidentia, & breviori tempore contingit: atque hæc naturam salis fossilis indicare videntur. Quæ autem a sedimento aquarum sejuncta fuit terrena & pane insipida materies, a spiritu vitrioli continuo fermentatur; item a spiritu salis, multæque, & amplæ simul bullæ exsurgunt. Sed alcalinæ indolis quiddam in ipsis etiam aquis per admixtionem syrupi violacei patefactum est: quamquam enim color non subito immutetur, tamen paucis horæ momentis subviridis, & gradatim viridior apparet. Insuper ab affuso guttatim acido spiritu commotio quædam excitatur; unde frequentes in aqua fiunt bullulæ, quæ summam ejus superfi-

perficiem celeriter petunt. Et quia res aliæ facile ad alias mentem revocant, idem quoque explorare libuit in ea terrestri materia, quam naturaliter separari ab aquis defluentibus, & sensim lapidescere dicebam. Nempe hujusce tofi solido segmento instillavi spiritum vitrioli; & confestim exorta est lenis fermentatio, quæ diu perduravit. Porro autem in alio ejusmodi fragmine pulverato gutta ejusdem spiritus magnam illico ebullitionem commovit, intereaque majusculæ passim bullæ in sublime ferebantur.

Sed quamquam hæc toto latice diffusa est materies alcalica, tamen in eodem ipso nihilominus liber, ac velut intactus manet sal quidam acidulus, quippe qui gustatu haud obscure percipitur, tum idoneo experimento demonstratur. Namque ab infusa heliotropii tinctura in aquis recens e fonte haustis coccineum, & in transvectis saltem rubellum colorem protinus liquor accepit; quem in aperto calice cum ad posterum diem data opera seposuissem, color is in purpureum descivit: quemadmodum per additionem heliotropii dumtaxat purpureus cernitur, si pridie aqua in patulo vase reposita fuerit. Per æstatem anni 1735, quinto post die quam aquæ huc perlatae fuerant, cum sæpe lagenam ad eas explorandas aperuissem,

tum fere ad dimidium depletam; nec satis bene oclufam reliquiffem; exactis postmodum horis quindecim fupersit aquæ portio altera cum heliotropio colorem fubrubellum exhibuit; in altera vero, quam decem inde alios dies ad renovandum experimentum fervaveram, purpureus tantummodo, & fere violaceo fimilis color apparuit; qualem in aqua me obfervaffe memini, quæ ad unum pluresve annos in lagenis accuratiffime obturatis permanferat, atque his quidem in fubterraneo loco repositis: tamenfi eadem plerumque limpida, & levis cujufdam faporis fubacuti etiam tum particeps quodammodo effet. Neque id tamen omittendum eft; aliquando repertam fuiffe in lagenis nonnullis rite oclufis aquam translucidam, quæ nihilominus halirum quemdam infuavem, quafi fuphureum, exhalabat. In hac autem ipfa æque ut in alia ex eodem fonte defumpta, quæ nihil quicquam olebat, biduo immerfus nummus argenteus innatum colorem fuum retinuit. Argentum quoque foliatum aquæ fuper ignem evaporanti impositum fuit ufque eo, dum totus pæne humor abfumptus effet; neque metalli color immutatus eft. Semel accidit, ut collocato vitreo vafe tum in umbra, tum in fole, nummus aqua fubmerfus aliquantum alboris amiferit. Ceterum  
memo-

memoriæ teneo plenam lagenam, exquisitè obturatam, amplius novem annos me asse-  
vasse in cella subterranea; aquam vero in-  
venisse limpidam, modici saporis, quæ nihil  
injudandum, nihil odori sulphureo simile ha-  
bebat.

Sed in aquis etiam *Victorianis* num quid  
ferrugineum contineatur, aliquoties indagan-  
dum putavi. Sunt enim qui ab indita gal-  
la confestim eas colore violaceo, postea sub-  
nigro infectas se vidisse mihi affirmaverint,  
quin immo litteris prodiderint. Hi scilicet  
experimentum ad ipsas scaturigines optabili  
exitu fecerunt: sed mihi non ita evenit,  
sæpe experienti in aquis diligenter ac recens,  
diversoque anni tempore in hanc urbem ad-  
vectis. Etenim cum gallam pulveratam ad-  
hiberem, initio facta est mutatio nulla;  
deinde sublimis apparebat nubecula; paucis  
post horis in toto liquore disjectæ cerneban-  
tur concretiones, ad fundum vasculi lapsu  
lentissimo accedentes; tum subvirescere li-  
quor incipiebat, & saturam denique viridi-  
tatem consequebatur. Aquis autem adjecta  
gallæ tinctura, post horas circiter duas, ma-  
gnam turbationem inferebat; hinc plures un-  
dique dispersi flocculi, eorumque nonnulli  
cito subsidentes: elapsis horis quindecim va-  
sculum denuo inspiciens, corpuscula quædam

in liquore turbido & viridi sparsim innatantia, quædam sedimentum constituentia, reperiēbam. Atqui concreciones ejusmodi, viridemque colorem in aquis medicatis efficere solet galla, in quibus alcalicum quiddam terrestre, vel falsum contineatur. Sed unum tandem experimentum in *Victorianis*, sub æstatis finem huc allatis, melius aliquando successit. Nam licet ab infusa gallæ tinctura nihil inter initia immutaretur color, postmodum rufus sensim apparuit, & paulo magis postridie, cum turbidus esset liquor; quem octo elapsis diebus adhuc turbulentum, colore bætico, inveni. Itaque ex iis omnibus, quæ dicta sunt, præclare intelligitur, aquis procul a scaturigine transvectis, quantum volatilis illius spiritus evanescat; simul vis ipsa elementi martialis, vel, ut aliqui volunt, vitriolici, quam valde imminuatur.

Haftenus de *Victoriano* fonte: ad alterum veniamus, cui *Margarita* nomen datum fuisse diximus. Hic pellucidam & aliquantum calidam aquam ubertim emittit, quæ subacuto, & nonnihil etiam acidulo quodam sapore sensum afficit. Initio profluentem illam excipit ligneus canalis, qui rufa & molli materia terrestri oblitus cernitur: collectum ejusmodi recrementum, cum exaruit, friabile est, & ochræ paulisper torrefactæ speciem

ex-



exhibet. Ubi aqua ligneum canalem prætergressa est, simili sedimine, sed paullo minus colorato, & minus molli terrenus alveus, & sparsi per hunc lapides obducti sunt; atque illud idem, prout aquæ mineralis rivus ad exitum suum appropinquat, magis concretum, & compactum invenitur. Talis materiæ portionem ex memorato canali depromptæ simul cum aqua commuhi agitabam in vitreo vasculo, tum vitrioli spiritum instillabam: statim oborta est fermentatio, quæ amplius horas duas perduravit: interim extricatæ hinc & illinc a subsidente materia complures particulæ in sublime ferebantur: absoluta omni commotione liquorem transfudi rubellum & pellucidum, terra superstitæ, coloris maximam partem luteoli, minimam subcinerei. Atque acidi quidem spiritus cum hac una terræ portiuncula cinerea conflictus fuit, neque omnino ullus cum ea rufa & copiosa materia, utpote quæ ad experimentum separatim adhibita nullo pacto fervebat; perinde ut ipsa communis ochra nihil ab eodem acido liquore commoveretur. Illa igitur substantia, quam ochræ paululum torrefactæ, coloris causa, comparavimus, intermixtas partes aliquas ex alio genere terrenas, & alcalicas continet, ab eodem ipso fonte profectas. Aqua enim calore



lore modico evaporata sedimentum reliquit albidum, cujus quantitas tertia parte minor erat, quam residui ab evaporatione *Victoriana*: & paullo etiam minus acuti saporis mihi visus est sal elicitus per lixivium, qui septimam tantummodo sediminis partem constituebat. Sali guttatim affusus chalcanthi spiritus lenem commotionem facit. Terrestris autem a sale sejuncta materies, iterum lota, siccata, & prope insipida, cum aceto distillato protinus confligit; atque in eadem spiritus vitriolicus fermentationem cum aliquo fremitu & bullulis excitat. Sed in aqua ipsa hujus fontis, ut de *Victoriana* meminimus, alcalicum quiddam, adjecto syrupo violarum,prehenditur: liquor enim aliquot post horis viridem colorem acquirit.

Nostræ vero expectationi minus respondit experimentum, quo acidus sal, si cuiquam inest liquori, demonstrari solet. Nimirum aqua illico hausta de scaturigine quamquam ab heliotropii pulvere insperso bene rubicunda fiat, quemadmodum ab experiente viro accepi; tamen in eadem ad nos allata (id quod semel & iterum exploravimus) ne levissimi quidem nota ruboris apparuit. Tamen si per eam sulphuris tincturam, quæ cum viva calce paratur, continuo liquor omnis lactescebat, graviolemque odorem sulphureum

reum exhalabat: hoc videlicet probabile indicium esse potest residui cujusdam subacutisalis, qui etiam acidi particeps bibentibus nonnullis videtur. Nec porro cum aquis huc advectis gallam permiscendo colorem illum cernere mihi licuit, sive violaceum, sive nigrum; quem aliqui asseverant juxta fontem se conspexisse. Namque ab affusa gallæ tinctura nihil primo die immutatus est liquor; postridie mane virescentem, vespere satis viridem reperi. Ex terreo quidem & alcalico sedimine quoddam vestigium substantiæ martialis deprehendere aliquando visus sum. Etenim cum albidam primum terram illam aquæ communi, deinde tincturam gallæ adjecissem, magis turbidum liquorem fieri, & paullatim fuscum animadverti: post aliquot dies cum prope omnis humor æstivi solis calore evaporasset, residuum in fundo calicis atrum inveniebatur, atque illius tota superficies concolori crassamine obducta. Sed idem fere evenit, cum ad vivæ calcis solutionem tinctura gallæ adjecta fuit: postquam enim humor sensim totus evanuit, in radio solis collocato vase, ad hujus latera, & fundum hærebat nigra materies, quæ de-rasa quasi fuliginem repræsentabat. Aquæ Augustanæ sedimentum terreum, bene ablutum, siccatum, & torrefactum, ex eo etiam  
cum

cum terra calcaria similitudinem habere aliquam videbatur, quod amaritudine quadam gustatum afficiebat, ut eadem calx illa, quam ad experimenta delegeram, id est calcem vulgo fortem a nostratibus appellatam.

Quæcumque vero alia peculiaris natura sit terrenæ & subsalsæ materiæ, particulatim diffusæ in aquis Augustanis, verisimile est in eodem isto principio maxime positam esse vim abstergendi viscera, & alvum subducendi: qua nimirum facultate *Victoriana* ob talis materiæ majorem copiam alteris excellunt. Eademque vis illa idcirco minor esse solet in aquis longe transvectis, quia sensim ab his terrestres particulæ secedunt, quas partim lagenis adhærescere, partim subsidere diximus. ad vias quidem renales utriusque fontis aquæ, procul etiam translata, facilem plerumque aditum habent. Omnino autem nostrarum efficacior virtus est, sicuti ceterarum prope omnium, si proxime scaturiginem bibantur. Quibus vero ægrotis Augustæ Prætoriæ immorari opus est, hi novis identidem & nocturno tempore advectis commode uti possunt: ita scilicet earum subtilia & actuosa elementa non adeo multa evanescere solent. Ceterum haud paucos mihi cognitos homines enumerare possem, qui ex malo hypochondriaco, viscerum obstructio-

ne; affectibus renum a pituita & arenulis; cibi fastidio, doloribus intestinorum, tum ex genere quodam vertiginis, ubi lentitudo esset impuri sanguinis, atque aliis præterea tardis morbis laborantes, ab usu aquarum, præfertim repetito, non mediocre levamen obtinuerunt.

Sed illud de Augustanis minime omittendum puto, quod fere aliis medicatis aquis commune est; eandem videlicet in iis efficacitatem non perpetuo reperiri. Equidem *Victorianas* memini circiter medium Julium anni 1636 in hanc urbem allatas fuisse, quarum imbecilliolem vim sensus iudicio, factisque experimentis cognovimus. eoque tempore viri quidam, hauriendis a fonte aquis, & accurate in vitrea vasa reponendis præfecti, non modo id ipsum animadvertent, sed etiam e scatebra multo uberius, quam proximo superiore anno, aquas profluere. Cujus rei causa ad majorem nivium copiam, in eo tractu montano adhuc liquefcentium, merito referebatur: & revera insequentis Augusti initio vena minus abundans, & aquæ valentiores esse cœperunt. Ac permagni sane interest, ut integra & actiuosa illarum virtus sit: robusti enim, quam morbus postulaverit, valentiolem medicinam in *Victorianis* reperiunt; ceteri *Margaritæ*

*garitæ* aquas deligunt, vel prioribus; adjecta portione aquæ communis, utuntur. Quod autem plerique, ut moris est, curationem summa æstate aggrediantur; saltem bene sibi consulunt, qui natura calidi & graciles lavant per aliquot dies in aqua simplici, antequam bibere incipiant, & iterum, cum bibendi finem fecerunt. Etenim aquæ medicatæ, quibus resolvendi & evacuandi virtus data est, universo corpori commotionem, calorem, siccitatem inferunt. Quapropter ad ejusmodi corrigendam intemperiem parata ex pullis gallinaceis juscula cum emollientibus herbis & refrigerantibus, præter alteram lavationem, sæpe a Medicis commendantur.

Atque hæc breviter loquuti sumus de Fontibus duobus Augustanis, qui fere ab anno 1680 cum magno usui esse cœpissent, his quoque temporibus frequentari solent. Namque alia quondam cognita scaturigo non ignobilis a proximo exundante fluvio consumpta est: ceteræ autem exiguæ & superstites vix ullius momenti sunt. Sed non ita pridem compertum esse fontem accepimus in ea regionis parte, quæ ab indigenis *La Saxe* appellatur; idemque huic Fonti nomen tributum fuit. Vena satis fecunda esse dicitur aquæ propemodum frigidæ, perspicuæ

cuz, sapore subacido, halitu sulphureo ; qui tamen gravis odor, aqua in lagenis alio translata, evanescat. Quo loco exoritur, paullulum albidæ viscosæque materiæ deponit, inde profluens tenacem quoque aliam, colore tum subflavo, tum fusco, & sulphureum quiddam redolentem. Nonnullis ab hinc annis ut aquæ illius plena ad me mitterentur vitrea vasa duo curavi: in altero limpida erat sine ullo acore, tantumque inferior ejusdem portio turbida: in altero pel lucida omnino, & aliquantulum acidula, ut ab infuso heliotropio subrubellum colorem exhiberet. Cum pulverata galla experimentum feci: liquor ab initio nihil immutatus, paucis post horis coloratior ac turbidus apparuit. Aqua omni ad ignem lenem evaporata terrenum sedimen inveni, fursuraceum, & luteolum, interjectis micis quibusdam perexiguus & lucidis: quo ponderato sedimine cognovi grana ejus circiter septena in singulis aquæ libris contineri. Talis materiæ facta infusio in aqua communi insuavis gustatu, nihil propemodum falsa, adjecto syrupo de violis nullam coloris mutationem tulit. Terram ab infusione residuam, bene siccata, cum aceto acerrimo leniter ac diu fermentescere, & vehementer cum vitriolico spiritu animadverti.

Equidem

Equidem scio mirificas & plane singulares aquæ istius proprietates & medicas vires celebrari a nonnullis cœpisse, ut primum cognita fuit, neque adhuc ad graves morbos adhibita. Verumtamen si eamdem in acidulis numeramus, præstantiores ceteræ videntur Aquæ Augustanæ; sin potius in sulphureis, profecto Gratianæ in Sabaudia, & plures in Pedemontio, aut finitimis regionibus anteponendæ sunt. Nihilominus Fons iste, meo iudicio, haudquaquam contemnendus est; cujus videlicet usum ad quasdam acres humorum diatheses, indeque profectas partium solidarum, præsertim cutis, pravas affectiones, aptam & congruentem medicinam fore putaverim.





# DE AQUIS ANFIONENSIBUS.

**I**Nter oppida duo Cabellici Ducatus, Tunonium & Aquianum, tractus quidam est, ubi Aquæ medicatæ, vulgo *Eaux d'Enfion*, e secunda vena emanant, limpida, frigida, levi sapore ferrugineo, nec injucundo. E scatebra defluentes terrenum canalem, eosque præsertim filices, quos ipsæ alluunt, subrufa materia \*, quæ ochra est sui generis, obducunt, donec in propinquum Lacum Lemanum effunduntur. Et quamquam plures in confiniis reperiri fontes ferruginei dicuntur; tamen hic unus ex usu est, qui alios omnes percommoda positione, & latius abundantia longe antecellit. Atque his etiam naturæ similes aquæ ex adversa parte Lacus, nempe ad nonnulla Vaudensis regionis loca †, esse accepimus. Sed nostræ tantum Anfionenses huc usque celebres sunt,

C

æsti-

\* Habebam ferri massam fossilē, non admodum fractu difficilem, quippe quæ continuatum corpus non erat, sed innumeris veluti segmentis compositum. Cum eam disfringendo curiose introspicerem, terræ cujusdam subrusæ interjectas hic & ibi c. portiones varias animadverti. Atque hæc ipsa tum Anfionensi ochræ, tum Augustanæ, quam alio loco memoravimus, colore similis est.

† Sunt hæc nominatim gallica lingua, *S. Præx, Rolle, Nion*.

æstivoque tempore a nostratibus, & ab exteris frequentari solent, quibus opportuna est ad commorandum Aquiani proximitas. Nam quotidie mane per brevem trajectum navicula feruntur ad eam litoris partem, qua facile itur ad fontem, eodemque modo revehuntur in oppidum. Nec vero ceteris per eam tempestatem grave est terrena via in singulos quoque dies illuc se diluculo conferre. Aquam enim bibere ad scaturiginem opus est: alio translata, quam accepit a vena ferri, vim prope omnem deperdit; propterea quod ejus metalli substantia mirabiliter divisa est in partes minutissimas, brevi evanescentes. Itaque in aquam recentissime haustam de scaturigine inditus gallæ pulvis subrubellum liquorem efficit; minime vero si procul a fonte experimentum fiat; si postquam in vasis, vel diligenter occlusis, aliquo tempore aqua subsisterit. Nam licet in ochra martiales particulae contineantur, ita sunt irretitæ & abditæ in eadem terrestri materia, ut cum ipso latice communionem prorsus nullam habeant: tantummodo se ostendunt, cum eas peracer ignis expedit, qui ochram torrefecit. Porro in lagenis aqua repletis pauculum id quidem est, quod progressu temporis paullatim subsidit: hæc autem ipsa, quantumvis licet  
agi-

agitata, recrementum omne abripiat, sive ochreum, sive aliud quodlibet vitro inhærens, nullam tamen ferri manifestam qualitatem recipit. Ex tali aqua, ut artis est, evaporata sedimentum collegi, colore quasi cineraceo, terreum, & levissime falsum, cujus pondus erat granorum fere trium in singulas aquæ libras. Hoc illico & plurimis cum bullis effervescebat ab instillato spiritu vitrioli, quemadmodum ejusdem infusio ex aqua communi viriditatem syrupo violarum inducit. Infusionis autem istius commixta portio cum tinctura gallæ nullam initio mutationem fecit; sed viridem posteris diebus liquorem invenit: quod plane idem contingere memini, cum ad aquam ipsam gallarum pulvis adjectus esset. Atqui hujusmodi color, ab eo diversus, quo ferrea substantia denotatur, indicium est unius alcalicæ terrestriæ materiæ subsalsæ, quam illa duo ante allata experimenta demonstraverunt.

Nullum igitur in Aqua Anfionensi fixum principium ferrugineum, solutum, ac liberum reperias; ut ejusdem præcipua vis in eo martiali tenuissimo, & fugaci pulvisculo posita sit: cujus tanta quidem subtilitas est, ut quasi halitum dumtaxat recipere e ferrea fodina præterfluentes aquæ videantur. Namque illa terræ alcalicæ portiuncula exi-

qui sane momenti est: hujus vero fontis tam multas in morbis utilitates experientia patefecit, quæ ab ejusmodi materia, etiam largiter ægrotis data, expectari non possint. Olim Genevenses Medici duo clarissimi, CLERICUS, & MANGETUS, de Anfionensis Aquæ natura, & viribus, quas nondum satis cognitas habebam, me perhumaniter literis suis certiores fecerunt. Ipsi enim ad scaturiginem venerant, varioque in genere morborum qualem ea, & quantam opem civibus suis atque exteris attulisset, diligenter observaverant; cum alioquin eandem aquam vel diu epotam nemini unquam detrimento fuisse inter omnes constaret. Ad quas igitur ægritudines plerumque conferat, ex aliorum magis quam nostra observatione, maximeque ex illorum, quos modo nominavi, experientium virorum auctoritate, breviter exponam. Ac magno persæpe auxilio esse dicitur iis, qui ad ophthalmiam, erysipelas, hæmorrhagiam proclives sint; itemque mulieribus, quæ nimia menstruorum abundantia, vel suppressione laborent; non secus ac viris hiantium hæmorrhoidum profluvio, vel cæcarum importunitate, ac dolore vexatis. Admirari solet ignarum vulgus, quotiescumque ad morbos inter se dissimiles, immo contrarios quodam-

dammodo, unum idemque remedium adhibere Medici non dubitant: hi vero ambiguis effectibus non illuduntur, singulos discernere student; eorumque variantium causas investigant; caute insuper, cum res tulerit, medicaminum vires explorant; itaque ratione & experientia ducti ea non raro facienda jubent, quæ a vulgari opinione plurimum abhorreant.

In cibi fastidio, viscerum obstructione, sabulo affectis renibus, palpitatione cordis utiliter bibuntur. Hystericis porro, & hypochondriacis, ac generatim iis, quorum ipsa modica infirmitas quædam est in partibus nervosis, sæpe majus emolumentum hæc una, simplex, & suavis medicina, quam ceterorum farrago remediorum, attulit. Ex Medico Genevensi, quod ipse intellexerat, id mihi per epistolam aliquando significabat MANGETUS. Nimirum Aquianensis incola, propter assiduum dexteræ manus tremorem scribendo impotens, ob alias tamen invaletudinis causas Anfionensem fontem adiit: interea dum aquis de more utebatur, paulatim, atque in dies magis ac magis confirmari totius brachii vires sensit, ac nihil jam demum contremiscente manu redditus sit ad exarandas literas idoneus. Sed idem quoque remedium ad quasdam capitis affe-

Etiones plurimum confert; ut etiam morbum sustulerit in viro nobili, qui mihi testatus est a frequenti vertigine, quam perpeti solitus erat, se liberum jam multos post annos, & plane immunem esse. Denique ad cutis rubores, papulas, herpes magnopere commendatur. Et præsertim de quibusdam viris meminit MANGETUS terra scabie vexatis, qui ferrugineam aquam bibendo, quantum opus esset, ac læpius in eadem lavando consanuerunt, cum ex aliis antea medicamentis vix quicquam profecissent. Talis quidem laticis exterior usus ob salis penuriam, & ferreas particulas cito evanescentes, nihilo præstabilior videri potest, quam commune balneum ex aqua simplici; quod utique scabiosis de fonte illo bibentibus conducere arbitror: sed tamen ad ejusmodi labes cutaneas aliqua medicinalis virtus attribuenda saltem est ochreæ terræ, quæ modica licet quantitate censeatur, soluta in partes minimas, totoque latice diffusa, hunc ipsum lavationi magis opportunum & congruentem constituit.

Neque hoc loco rem singularem & miram de homine quodam pauperrimo, ex traditione habitam, præteribo. Is macilentus omnino & imbecillus, squalida & ulcerosa cute, cum in agro Anfionensi versaretur

tur

tur ; aliqui ex indigenis, miserrima illius conditione commoti, casulam ex tignis ac stipulis eidem paraverunt in vicinia scaturiginis, & cetera quæque ad victum & curationem præbuerunt: aquam bibere coepit, & constantissime perrexit, atque insuper in eadem diu lavit, ut bonam denique corporis habitudinem recuperaverit: itaque fontis saluberrimi fama ab eo maxime eventu percubuit. Si verum id omne est, ut a nonnullis accepimus, profecto illius gentis summa benignitas fuit, æque ac fortuna inopis ægroti: sin autem fabellam prodiderunt, tamen Anfionensis Aqua progressu temporis adeo multis profuit, & alios sanavit, ut, extra mirificos ejusmodi casus, tum in Sabaudia, tum in finitimis regionibus magnum nomen optimo jure sit consecuta.

Ceterum Aquæ hujus in potu adhibendæ ratio eadem fere est, atque aliarum mineralium. Quod autem nostra perfacilem ad urinales vias aditum habere soleat, ad alvum minus inclinet; ideo clysteribus, cum opus sit, vel pilulis ante cœnam datis, pro ægroti natura, dejectiones promovendæ. In diutinis morbis longiuscula uti curatione convenit; eaque tolerabilior est, si duas in partes tribuatur: nempe duodecim vel quindecim dierum spatio bibat æger quotidie ;

deinde, cum interquieverit totidem circiter dies, id ipsum repetat. Ubi aquæ hujus ferratæ virtus imbecillior videtur, quam morbi conditio postulat, quadantenus adjuvari potest frequenti usu pilularum, quæ ex spuma chalybis, & aloe imbuta succo violarum, vel pallentium rosarum, consistunt: ita etiam alvo stimulus, interdum opportunus, adjicitur; nonnullis enim paullo uberior egestio valde prodest. Qui vero congruentem moram fastidientes, aut longe secus, quam ceteri, opinantes, profuso potu se festinanter curari volunt, etsi talem utcumque ferant, audacius id quidem faciunt, nec propterea citius a morbo relevantur. Plurimos ante annos vidit amicus & collega meus robustum virum, humili statura, qui per continuos aliquot dies, cunctis admirantibus, qui præsentibus aderant, aquam ad quingentas uncias haurire trium horarum spatio solitus erat, eamque inde omnem per vias urinales emittere. Itaque rem sibi propositam brevi confecit, ac de immoderati potus utilitate nihil gloriatus Aquiano confestim discessit. Sed alium quemdam honesto loco natum scimus, quam considerate & patienti animo curationem instituit, feliciter absolvisse. Hic a cibo jamdudum abhorrebat; capitis doloribus assiduè  
pre-




premebatur ; decoloratam & squalidam faciem habebat : de consilio præstantis Medici ad præfinitum usque diem bibendis aquis processit ex ordine ; & cum satis bene evenisset, non continuo, ut fieri solet, abeundum sibi esse putavit : ibidem sua sponte immoratus est menses prope duos ; eandem medicatam aquam bibere ex intervallo, restamque adhibere victus rationem perrexit ; ac tum denique confirmata valetudine ingenuus idem & prudens vir in patriam rediit. Anfionensem, ut auditione accepi, procul a scaturigine infirmi quidam homines ad se perferendam curarunt, quibus ea nihilominus haud mediocri emolumento fuisse dicitur. Facile id. quidem concedimus : jamdiu enim quibusdam naturis, diversoque in genere morborum, aquæ simplicis usum saluberrimum Medici cognoverunt ; quin etiam compertum habent nonnullos ab aquis mineralibus læsos, postmodum a simplicibus & purissimis adjutos fuisse. Ubi vero actiosa vis quædam aquarum requiritur, quæ in partibus alicujus mineralis tenuissimis & fugacibus posita sit, certe quidem ægroti ad proxima fontibus loca mittendi sunt. Dicere quisquam potest, id genus particulas a nostris quidem sensibus se abducere, non tamen a latice aquoso evadere penitus & evolare

lare ; nempe eas tantummodo ab aliarum quarumdam societate & nexu disjungi, tum aliis terrenis & crassioribus se illigantes considerare. Quod vero commotis, & multiformiter excussis lagenis, cum omne suum sedimen aquæ receperunt, jam prorsus nullum propriæ naturæ indicium præbeant, ut de nostris diximus ; idcirco neque nativam integramque iis inesse virtutem arbitrari licet. At enim, inquires, facilis hæc Anfionensium commutatio vel in occlusis vasis, multoque magis si paullulum ipsæ incallescant, similiter in ventriculo fieri debet ; nec propterea quales ad fontem bibuntur aquæ, tales in sanguinem & viscera perveniunt ; ac perinde est atque alio transvectas bibere. Sane quidem vereor, ut ejusmodi ratio philosophandi ad medicam artem plurimum conferat : enucleate ac subtiliter, si placet, de subiecta quacumque materia disputemus, dummodo ( id quod præcipuum est ) accuratis observationibus nitamur. Quamquam igitur in quæstionem res incidit, cujus explanatio non adeo difficilis videtur ; nunc tamen satis habeo illud unum dicere : a potu videlicet Anfionensium aquarum qui majus levamentum, vel sanitatem consequuti sunt, hi omnes, quantum scire potui, easdem proxime haustas de scaturigine adhibuerunt.

JOH.

JOHANNIS FANTONI  
DE FEBRIBUS MILIARIIS  
*HISTORICA*  
*DISSERTATIO*



## A D L E C T O R E M ;



*Ultæ mihi superioribus annis impedi-*  
*mento fuerunt, quominus hanc de*  
*Miliariis Febris Dissertationem*  
*perficerem: de quo nempe argumento*  
*commentari aliquid, & consignare litteris cœpi,*  
*ut primum ejusmodi febrium genus perniciosum*  
*in urbe Taurinensi percrebuit. Istæ scilicet ab*  
*initio ita infestæ, ac prope fatales erant femi-*  
*nis, præcipue nobilibus, quæ recens peperissent,*  
*ut is puerperarum proprius & peculiaris morbus*  
*diceretur. Postea vero cum idem cives & inco-*  
*las vix ullo sexus, ætatisque discrimine invasit;*  
*tum velut ingentis, atque endemius civitatis*  
*nostræ habitus est, usque dum præmaturi judicii*  
*errorem patefecit infelix eventus: namque ino-*  
*pinato hinc & illinc exortam eandem luem, atque*  
*in toto pæne tractu Pedemontano sensim diffu-*  
*sam vidimus. Sed interim alia quædam infixa*  
*hominum mentibus hærebat opinio, qui proximis*  
*videlicet temporibus primo apparuisse in terris*  
*tantum id malum existimarent. Enimvero sic*  
*fieri solet, ut quæcumque prius invisæ, vel in-*  
*audita præter expectationem obvenerint, ea pla-*  
*ne & omnino reputentur nova, quorum tamen*  
*vetusta plerumque origo sit: quemadmodum lon-*  
*ge veterius, quam vulgo creditur, genus omne*  
*fe-*

februm miliarium apud eximios Scriptores reperimus. Nimirum ut papulas miliares sine ulla febrili corporis affectione, ita conjunctas cum talibus exanthematis febres, siue natura mites ac benignas, siue etiam acutas & vebementes, a priscis Medicis observatas fuisse constat. Sed graves istæ ac perniciosæ per multas ætates insolenter & raro incidisse videntur; quæ recentiori memoria suscitata simul & frequentes, immo domesticæ & familiares factæ sunt quibusdam in regionibus, ubi passim vagari tamquam in proprio solo perseverant. Atque hæc ipsa, erudite Lector, quæ tibi breviter ac summatim exposui, nostræ Dissertationis capita esse intelligis. Ad februm autem miliarium historiam quo planior & luculentior aditus fieret, præcæmilio dicendum putavi de antiquorum propagatione morborum, maximeque exanthematum specie dissimilium, quæ socias sæpe febres habentia peculiare hisce singulis nomen dederunt. Et quamquam hic multa & varia enarrando longius, quam in præcæmio deceat, proventus sum; tamen cum instituti mei ratio id postularer, hanc mihi veniam te facile daturum esse confido.

## DISSERTATIO

DE FEBRIBUS MILIARIIS,

*Ubi antiquitas earum, & progressus  
exponitur.*



**L**ABIUS PAULINUS in Prælectionibus suis (1) de memorabili Peste Atheniensium, quam accurate narravit THUCYDIDES (2), idem fere cum PLUTARCHO, & cum præclaris Medicis ALEXANDRO PETRONIO, & MARCELLO DONATO sentire se profitetur; eam videlicet conditionem esse mortalium, profecto miseram, ut antiquis non modo, sed maxime novis in dies exorientibus morbis angî ac torqueri soleant: id quod plurimis rerum præteritarum monumentis constare iidem viri doctissimi arbitrantur. Atque ita sane primis evenisse mundi ætatibus censendum est, ac per aliquot inde etiam sæcula, posteaquam orbem terrarum prope universum homines habitaverunt. Quo nempe longissimo tem-

(1) *Prælectiones Marcæ, sive Commentaria &c.* pag. 28. & seq. In Gymnasio Veneto ad Bibliothecam D. MARCI Græcas litteras, in alio Latinas docebat Philosophus, & Medicus illustris, FABIUS PAULINUS, patria Utinensis.

(2) *De Bello Peloponnesiaco lib. 3.* ubi etiam se ipsum pestilentia correptum fuisse scribit THUCYDIDES.

temporis spatio proprias cujusque regionis, & subinde variantes intemperies cœli; qualitates nutrimenti omnes, cujus tanta est ubique gentium diversitas; & cetera quæcumque a natura universa suppeditantur, tum in decursu vitæ obvenire solent, eaque valetudini secunda, vel adversa, experiri potuerunt. Quibus igitur pravis affectionibus corporis & masculi, & feminæ, dissimili habitu ac temperamento, pueri, adulti, senes; tum homines ii, qui oppida, & nobilissimas urbes, vel campestres agros; humilia, vel montana loca, vel oras maritimas incolerent, vel ipsa etiam maria longe lateque ambulant; ceterique in labore aut otio, in paupertate & squalore, aut in opulentia & voluptate vitam agentes: uno verbo illi omnes ex omni conditione homines, quibus tandem morbis subjacerent, sive ob evidentes causas, sive occultas, persæpe compertum fuisse in tanta longinquitate temporum, facile intelligi potest. Jam vero ad nostram ætatem propius accedendo, si communis ista calamitas humani generis consideretur; mihi quidem probanda maxime videretur illorum opinio, qui antiquos esse volunt plerisque morbos (1),  
atque

(1) Plerisque dico morbos, non equidem omnes. Fieri enim possunt fortuitæ quædam, & incomprehensibiles exteriorum, interiorumque causarum complexiones; unde morbi ex novo genere aliquo exoriantur, qui a vetustissi-



atque ab aliis regionibus quoquo modo transmitti in alias, ubi revera tanquam novi, & in loco ipso nati appareant: vel antea rarissimos, & perpaucis Medicis cognitos, jam frequentius incidere, & sensim magis ac magis increbrescere: graviore sive ac perniciosos tandem aliquos fieri, qui multo minus detrimentum hominibus asserre quondam soliti fuissent. Atque hujusmodi vicissitudines majorum, sive ex contagione, aut rebus fortuito advenientibus (1), sive ex gentium quarundam errore, & vitio, quæ potissimum a sim-

D

plici

mis usque temporibus nullo terrarum orbis loco acciderint. Hoc autem si raro evenire suo jam tempore putavit CORNELIUS CELSUS, nunc multo magis insolens fore censendum: Rarius, ait ille, *sed aliquando morbus quoque ipse novus est: in Præfatione lib. 1. Medic.*

(1) Inter causas adventitias, easque multiplices, a nonnullis auctoribus annumerantur minutissima quædam insecta, humanæ naturæ plus minus insensa, quæ in aere vagantur, oculorum sensum fugientia, & aliquando ab una regione in aliam, per ventos deferantur; quemadmodum id constare dicunt de parvulis vegetabilium seminibus, unde in aliquo terræ tractu mirabiliter exortæ sint plantæ, in quo tales antea nullæ umquam conspectæ fuissent. Hi nimirum acutissimi naturæ interpretes insolentium quorundam morborum latentes causas, quæ omnino ad inanima corpuscula invisibilia, aerem inquinantia, referri solebant, per exiguis hisce bestiolis, vel earumdem volubilibus ovulis, sæpius esse tribuendas arbitrantur. Quorum opinionem tantummodo indicamus: nihil est enim, quod in tanta rerum istarum caligine nobis ita cernere animo liceat, observationum lumine destitutis, ut potius ad hanc sententiam, quam ad alteram, accedamus.

plici & recta victus ratione recesserint, evenire videntur (1).

A Saracenis olim Variolæ, quas ipsi fortasse ab aliis habuerunt remotioribus Orientis gentibus (2), in ceteros Tractus Asiaticos, in Africam, & Europam, tum ab Hispanis in Occidentales Insulas translatae sunt, unde Venerea Lues ad nos pervenit, atque in partes orbis terrarum pæne omnes diffusa est. Hanc nempe turpissimam luem, a priscis usque temporibus per se exortam in Hispaniola, & familiarem indigenis, Europæi per contagium in eadem Insula contraxe-

(1) De corruptis Helvetiorum moribus vehementer, & lamentabili quodam modo, conqueritur conterraneus ipse, vir plenus animi, DEREBECQUE, simul alias nationes pungere haudquaquam veritus: *Proh dolor!*, inquit, \* *cum, antiqua frugalitate, & simplicitate in victu derelicta, Italarum, Gallorumque mollities, ac delitiæ in patriam nostram introducæ fuerint, & cum iis vitia horum plurima, simul etiam morbi multi olim nobis incogniti corpora nostra affligerent.* \* In Præfatione ad Prodromum Medicinæ Helvetior, ubi cætera videtis, quæ hoc loco prætermisimus.

(2) Primi Scriptores, ut bene animadvertit FREINDIUS, de Variolis, non tamquam recenti apud Arabes morbo, meminerunt. Hic autem quod sæpe gravis morbus sit, nec raro perniciosus, idcirco RHazes, quo libro variolas exposuit, eum *De Pestilentia* inscripsit. Ac perpetuo quidem pestiferas esse in Ægypto ALPINUS affirmat *Medic. Ægyptior. cap. 13.* Japoniam pestis numquam invasisse dicitur; aliquando tamen in Insulis illis variolosa contagio majorem hominum stragem facit, quam pestis ipsa ceteris in locis edere soleat, quemadmodum perhibet GUIL. ten RHYNE in *Dissert. de Arthrit.*: contra vero cognitæ sunt regiones alix, in quibus generatim idem morbus a tali vehementia & feritate quam longissime recedit.

traxerunt . Cur autem apud illam gentem procreari malum ejusmodi pestiferum haud difficile potuerit, multiplices, easque graves profecto, & efficaces causas in medium adducit, & singulatim exponit clarissimus ASTRUC (1) in opere illo egregio, & profecto, quod *De Morbis Venereis* inscribitur : ubi docet antiquum etiam, peculiarem atque endemium esse morbum in Peruviano Regno, tum in reliqua pæne tota continente Americæ parte : idemque porro addit in Africa inferiore, in Guinæa, in Malabaria, in Java, & Molucis Insulis, jampridem vulgo innotuisse quendam affectum, qui Venereo Americano similis censetur . Ac nonnullæ sunt insuper ægritudines diversi generis, quarum commemoratio ad hoc nostrum institutum pertinet,

JOHANNES WIERUS Brabantinus, olim Clivæ Ducis Archiater, in libello *Medicinalium Observationum*, qui anno 1567 in lucem prodixit, de Scorbuto loquitur, antiquo certe morbo, quarumdam regionum proprio, videlicet

D 2

delicet

(1) LUDOVICO XV Galliarum Regi a Consiliis Medicis, in Regio Franciæ Collegio Medicinæ Professor &c. cujus Auctoris vide *librum 1. cap. 2.* Optabile omnino est, ut ASTRUCI imitator aliquis, præstanti ingenio, doctrinæque vir, eas etiam accuratissime causas perscrutetur, quæ juem illam Orientalium quarum am regionum antiquitus propriam, nimirum variolas, progignere potuerint.

delicet septentrionalium (1), maxime ad oras maritimas, qui tamen haud multis ante annis latius vagari, easque nationes aggredi & vexare cœpisset, quæ ne talis quidem luis nomen umquam audivissent. Quæ in re assentitur WIERO Belgicus alter scriptor DODONÆUS (2), simul animadvertit suo primum tempore in Bohemia & Silesia scorbutum apparuisse: & vulgarem in Gothana Provincia ab anno 1604 eundem factum esse docet CASP. HOFFMANNUS (3): quamquam SCHMITZIUS in *Compendio Medicinæ* id malum usque ab anno 1481 irrepsisse in Germania perhibet, auctore SPANGERBERGIO: & revera quinquennio post grassatum fuisse in Misnia vir clarissimus affirmat GEORGIUS FABRICIUS (4). Apud nos etiam Scorbutus, cujus

ta-

(1) Svecus auctor OLAUS MAGNUS Aquilonariis gentibus familiarem morbum describit, quem vulgus *Schoerbuh*\*, ipse *Castrensem* appellat, eoque obsessos præsertim, & inclusos affligi homines narrat: membra torpere, & *subcutaneo tabo liquecere*; pallidam & cæruleam cutem fieri; stupore dentes affectos esse, vacillantes, caducos; præterea ægrotos nausea laborare: addit ejusmodi malis absinthiacum potum diu continuatum mederi. *V. Histor. Gent. Septentrion. lib. 16. cap. 3.*

\* Ab incolis Saxonix inferioris *Scorbock*, vel *Scorbuck* nuncupari dicit SENNERTUS, aliterque ab aliis nationibus.

(2) *V. Medicinæ Observat. c. 23.*

(3) *De Medicament. Officinal. ubi de Cochlearia sermonem habet.*

(4) *V. SENNERTI Tractatum de Scorbuto*, cujus peculiaris ibi species quædam ex FABRICIO describitur,

tamen plures sunt gradus & differentiæ (1); licet ignotus olim non esset, sic nostra memoria sensim percipit, ut cum antea horrificum quemdam, & pudendum morbum ægroti reputarent, atque ab eo denominando abstinere vellent, postea minus terri, eundemque demum proprio ipsimet nomine designare consueverint (2). Ceterum ab antiquis item Medicis indicatæ fuerunt hujusce luis quædam species, quas illi nimirum a partibus corporis præcipue affectis *Stomacacen*, & *Scelotyrben* appellaverunt: atque hæc ipsa apud PLINIUM nomina reperiuntur (3). Quod si ad scorbuticarum genus pertinent hujusmodi affectiones a PLINIO memoratæ, ac tum infestæ militibus, cum Rhenum trajecit, atque in Frisiæ Tractu castra posuit GERMANICUS Cæsar, inde col-

D 3

ligitur

(1) Multos quidem, ac difficiles morbos nonnulli solent Medici temere ad scorbutum referre: sed tamen hunc alii morbum angustis nimium finibus describunt. Vere enim scorbuticos tantum eos ægotantes cenſeri volunt, qui putridas, ulcerosas, ac fetentes gingivas habeant; vel quorum in artubus, præſertim cruribus, putræ ac livescētes maculæ appareant. Sæpe autem perſicaci malo, natura scorbutico, affectos homines videre licet sine talibus symptomatis, quæ tamen ipsa denique morbo jam valde provecto superveniunt.

(2) Raro Hispanos incidere in scorbuticam affectionem, dicit BURLETUS, nisi qui eam navigatione contraxerint. V. *Quæst. Medic. An pluribus Hispanor. Morbis Et. Præſide M. C. BURLET, e Soc. R. Paris. Hispaniar. REGIS Archiatro.*

(3) *Histor. Natur. l. 25. c. 3.*

ligitur, illo jam tempore scorbutum existisse, & Frisiis plane cognitum fuisse, utpote qui singulare quoddam ejusce mali remedium, sive herbam Britannicam, demonstraverunt.

Pergamus ad illam Anginæ speciem atrocissimam, quam proprie synanchen, vel gutturis laqueum vocant. Morbus iste cum paulo post initium præteriti sæculi Neapolitanos invasit, insolens omnino iis, atque adeo novus apparuit: inopinato enim homines adoriri, maxime pueros, & præcluso spiritu celeriter aliquos jugulare solebat. Sed probe animadvertit M. A. SEVERINUS (1) minime recentem esse morbum, scilicet Hispanis ante infestum, ut inter primos declaravit J. A. FONTECHA (2), tum ANDREAS TAMAIUS in *Tractatu de Garrotillo* (3); postmodum

(1) V. Auctoris libellum, qui inscribitur, *De Pædanchone Maligna*.

(2) JOH. ALPHONS. a FONTECHA, non FONSECA, ut apud SEVERINUM legitur, in Complutensi Academia Medicinam docuit, ejusque *Dissertatio de Anginis* impressa fuit A. 1611.

(3) Id opusculum, sive lingua vernacula, sive latina conscriptum, invenire nusquam potui. *Garrotillo* autem hispanice, vel *Garroteio*, incurvum ac teres lignum est, adhiberi solitum ad sarcinas, quæ jumentis imponantur, per validam funium coarctationem firmandas. Atque hoc usus est translato vulgari vocabulo TAMAIUS, ut synanches istius vehementiam exprimeret. Idemque etiam adhibitum fuit a CHRISTOPHORO PEREZ de Herrera, cujus nempe librum *Del Garrotillo*, hispanice, & latine editum Madriti, commemorat NICOL. ANTONIUS in

modum ad Sardiniam, Siciliam, Melitam; denique ad omnes Regni Neapolitani, tum huic finitimas quasdam provincias, transmeasse. Quamquam multo longius repetenda morbi origo est, quippe qui ab ARETÆO (1), præ ceteris veteribus, singulatim accurateque descriptus fuit, ut idem ipse rerum medicinalium, quas Græci tradidissent, studiosissimus adnotavit SEVERINUS. Quod si hujusmodi morbus eas frequentius regiones afflixit, quas nominatim diximus, aliquando tamen in aliis apparuit. Talem videlicet anginam plures Medici, FERNELIUS in

## D 4

pri-

*Bibliotheca Hispana*, ubi nullam de Tractatu illo TAMAIL, quem citat unus, opinor, SEVERINUS, mentionem facit.

(1) *De Causis, & Signis Morborum Acutorum lib. 1. c. 7.* cujus capitis brevem quemdam locum huc afferre mihi visum est: Eodem (scribit ARETÆUS) die moriuntur, qui celerrime, nonnunquam & antequam Medicum arcesserint; nonnulli & arcessito Medico nihil profecerunt: mortuus est enim æger, antequam Medicus vocetur. Cetera vide apud Auctorem, cujus opera egregia nuper ex græca in latinam linguam transtulit, atque illustravit doctissimus WIGAN.

Cum autem ejusmodi morbus diversa ratione, & longo etiam tempore aliquos divexare soleat; huc pertinere videtur Anginæ siccæ species illa, quam exponit BALLONIUS \*, ubi exigua est febris, & nullus ad gutturis partes tumor: *Vidinus*, inquit, ita affectos per 20. aut 30. dies laborare, cum squalore magno, infirmitate summa, ariditate, nulla siti, difficultate deglutiendi, oculorum quadam cavitate, fuliginoso spiritu arente, atque æstuante, ac si in hæcticam laberentur. Et ex nostratibus Medicis nulli hoc observaverunt, præter unum Dominum MAGNUM, omnium, quos ætas nostra fert, acutissimum & sollertissimum, qui vocat istum morbum Anginam synæcticam, Anginam colliquativam &c.

\* *V. Consilior. Medic. lib. 1. Consil. 54.*

primis, si bene memini, FORESTUS, BRASAEVOLUS, a se observatam fuisse prodiderunt: & nos quoque strangulatricem istam interdum vidimus. Sed præterire jam licet ejusce generis morbos, atque ad eos reverti (quoniam a variolis exordium cepimus) qui ab efflorescentibus in cute maculis, aut pustulis, denominationem habuerunt:

Quæ olim Germanis ignota erat *Rössali*, primum Schwinfurti a diligentissimo FERRIO conspectam fuisse anno 1652, TILINGIUS (1) prodidit: tamen eam descripserat antea SENNERTUS (2); utpote quam ipse Wittebergæ aliquoties vidisset, quemadmodum Uratislaviæ semel in puero DORINGIUS. Atque hæc profecto a morbillis distinguenda affectio est: neque enim parvæ ac rubræ papulæ, sed ampliores maculæ sunt plurimæ, & minores aliquæ, rosæ, quasi ignitæ, toto corpore diffusæ (3); quas propterea censebat BALLONIUS ad naturam erysipelatis, ut morbillos ad herpetem, accedere (4). Sed multis fere incognitum hunc affectum dilucidavit, libro *De Tumoribus*, ab hinc annos prope ducentos, Siculus ille, nobilis Medicus,

IN:

(1) V. *Traçtat. De Febr. Petechial.* pag. 58:

(2) *Lib. 4. de Febr. c. 12.*

(3) Frequentes hæ maculæ interdum se se contingunt; ut universa propemodum cutis rubicunda sit, & *scarlatina* febris speciem exhibeat.

(4) V. *Lib. 1. Epidemior.*



INGRASSIA (1): Et facile quidem putaverim eundem ipsum esse morbum, quem peculiari quodam nomine signatum brevissime expressit AVICENNA (2): *Est, inquit, Alhamica aliquid inter variolas; & morbillos; & est salviaior ambobus*. Cum eodem quoque is convenit; quem, *Alsara* a se nuncupatum; pluribus verbis exposuit ALSAHARIVUS: namque hujus morbi symptomata; ut ipse declarat; non valde differunt ab iis; quæ in *Albasba* obtingere soleant; atque hac altera voce significari morbillos docet ejusdem Auctoris latinus interpret (3). Ex Arabicis autem Scriptoribus HALY ABBAS (4) *Rössaliam* indicavisse primus videtur; qui tales maculas denominavit *Rubeolas*; ex calido & subtili; nec multum malo; ut idem ait, sanguine progenitas: ubi tamen animadvertit eas in progressu fieri similes granorum

(1) Neapolitani, ut idem Auctor perhibet, tum *Rossaliam*, tum etiam *Rossaniam* vocitant: Latini quidam Scriptores *Rubiolus*: Etrusci *Rossella*, vel potius *Rosella*. NICOL. CHESNEAU *Observation. lib. 4. cap. 5.*, *Rubiolam* dicit a Massiliensibus proprio vocabulo *Rougeole*, & Morbillos vulgo *Senapion* denominari: quamquam in ea regione Vaconix, in qua ipse commorabatur, numquam se vidisse *Rubiolam* affirmat, & solos ibi communes esse Morbillos; lingua vernacula *Sarrampin* appellatos:

(2) *Canon. lib. 4. Fen. 1. Tract. 4. cap. 2.*

(3) V. ALSAHAR. *Lib. Theor. & Pract. Tract. 31. Cap. 8. & 11.* quem SIGISMUNDUS GRIMMIUS librum accurate in lucem deprompsit.

(4) *Theor. lib. 8. c. 14.*

norum milii, aut paullo majores. Equidem  
 vidi aliquoties oborta singulis prope grani  
 grana singula, quemadmodum istas nonnum-  
 quam morbillofis exanthematis interspersas.  
 Neque ita insolens est, ut primo in facie  
 morbilli, sive disjuncti, sive agminatim dis-  
 positi; deinde latæ maculæ & bene rubicun-  
 dæ in pectore, brachiis, aliisque partibus  
 efflorescant. Quum autem in affectibus ejus-  
 modi cutaneis incidunt anomalix, quonam  
 latino verbo (dum etiam vulgari caremus)  
 quælibet earum species appellanda sit, pro-  
 fecto nescimus, & parum fortasse, meo judi-  
 cio, interest scire; quoniam singulæ possunt  
 ad principale genus quoddam referri. Di-  
 stinguendæ sunt omnino, ac peculiariter de-  
 finiendæ in arte medica res præcipuæ & sta-  
 biles; minus vero studii operæque in vagis  
 & minutis ponendum est: jam enim voca-  
 bulis fere inanibus plus nimio abundamus:  
 atque utinam ad eos morbos, qui tam mul-  
 tis & speciosis nominibus designantur, minor  
 esset optimorum inopia remediorum. Verum  
 hæc a proposito aliena prætereamus, & in-  
 choati sermonis viam persequamur. *Scarla-*  
*tinam* febrim, sicut eam vocat, & describit  
 SYDENHAMIVS, ex *Rossalia* utique repeten-  
 dam esse putaverim. Principio scilicet obri-  
 gescere, atque horrere dicit ægrotos, dein-  
 de

de incalescentes non admodum vehementer laborare: postea cutim universam crebris & latoribus, magisque rubentibus infici maculis, quam in febris morbillosa: has evanescere paucis diebus, & squammatim, vel furfuris instar, cuticulam abscedere. porro addit SYDENHAMIUS morem esse ejusdem morbi, ut integras familias, maximeque pueros aggrediatur. Similiter LINDESTOLPE, Svecorum classis Medicus, de quadam febre meminit (1), quæ Aprili mense anni 1710 plurimos nautas corripuit, cum raucedine, atque amplis in facie, & pectore apparentibus maculis: quod autem ægritudo gravis non esset, aliqui ne jacere quidem soliti erant: emisso sanguine, & data opii tinctura, sanabantur omnes: attamen raucedo diu perdurabat. *Scarlatina* hæc febris, ratione macularum, ab Auctore denominata est, quæ etiam *Rossalia*, si recte quidem sentio, species quædam censenda est: nisi forte scorbuticæ fuerunt maculæ, occasione febrilis motus, affectoque simul gutture, exortis: id quod facile nautis, in plaga præsertim boreali, evenire potest. Ad summam nihil hac de re decernimus: sed tamen illam proprie *Scarlatinam* febrim appellandam esse arbitramur, in qua non isto modo maculata

cutis

(1) V. Librum *De Venenis* pag. 248.

cutis, sed ferme in totum rubicunda sit : atque hanc ipsam melius coccineam, quam ex vulgari consuetudine *scarlatinam*, vocari. Quamquam plane licebit novitatem utriusque nominis repudiare: ejusmodi enim febris una & eadem esse videtur, ut continens illa, quam Græci nonnulli rubram, sicut aliam quamdam lividam, ab immutato exterioris corporis colore, nominaverunt (1): atque adhuc nos ipsi albam, ut solebant veteres, in febrium numero reponimus.

Nunc eas longe diversas commemoremus cutis maculas (2), unde malignæ quædam febres vulgo purpureæ aut peticulares dicuntur; quod veluti novum morbi genus primo apparuisse in Italia circiter annum 1705 a Scriptoribus Medicis proditum est. Inter Græcos ACTUARIUS de hisce maculis meminit

(1) V. PAULINI *Præle&. Marc. pag. 294. & seq.*

(2) Alii Peticulas vocant, alii Petechias, quæ vox ab Italica *Petecchie* manavit: a Neapolitanis appellari etiam *Pestichias* tradit INGRASSIA; sed hanc appellationem jam antea in quosdam tractus italicos induxerat gravis auctor NIC. MASSA, qui in præmio libri sui de *Fibr. Pestil.* ita scribit: *Vulgo Venetiis petechias corrupto vocabulo appellant: ego vero pestichias melius nominaverim, cum fibrem pestilentialem consequantur.* Et quoniam perexiguæ interdum maculæ sunt, ut quasi puncta diceret; inde Medici nonnulli febris *puncticularis* nomen duxerunt. Hæc scire quidem convenit Medicinæ studiosis; sed communi aliquo uti vocabulo, genus unum idemque morbi designante, præstabilius videtur: nomen autem *puncticularis*, propter maculas fere micropocres, aliquando majusculas, minus idoneum puto.

nit (1) five exanthematis instar morfus pulicum, vel rubicundis, vel purpureis, vel nigricantibus; & pejora quidem rubris agnoscit purpurea, nigra omnium pessima. FRACASTORIUS (2) communem esse morbum certis regionibus, ut Cypro, & vicinis Insulis perhibet (3). Ab Italis ad Germanos eadem lues pervenisse creditur, quam Halæ Saxonum popularem existisse temporibus suis BALTH. BRUNNERUS docet in *Consiliis Medicinalibus* (4), quæ ab ipso conscripta fuerant ab hinc annis fere centum & quinquaginta. Postmodum LOTICHIVS, ubi de malignis febribus in Hassia epidemicis sermonem habet (5), talia Marpurgi anno 1640 exanthemata primum deprehensa commemorat; tum in eo volumine *Observationum*, quod inde novem post annis evulgavit THONERUS, Ulmenfis Medicus, *Febrem continuam cum*

(1) *Method. Med. l. 1. c. 2.*

(2) *De Morbis Contag. l. 2. c. 6.*

(3) *Febrem peticularem in regione Sinarum, quam Sericam dicunt, frequentissimam esse mihi retulit civis quidam meus, qui eam per plures annos habitavit. RODER. a FONSECA Consultat. Medic. Tom. 2. Conf. 31.*

(4) Videlicet in *Consil. 42 & 43.* Obiit BRUNNERUS A. 1604. sed plurimos ante annos ab eo *Consilia Medica* litteris consignata fuisse ex ejusdem vitæ historia intelligimus.

(5) *V. Consilior. & Observat. Medic. l. 1. Observat. 15.*

*cum petechiis efflorescentibus* exponit (1). Serius autem in Tractu Wirtembergico idem morbus grassari cœpit, anno scilicet 1684; eoque tempore minus Tubingæ, quam aliis provinciis infesta fuit (2). Ceterum multo prius quam ab Insula Cypro, vel quibuscumque ultramarinis terræ partibus in Italiam hæc lues allata esset; forte in aliqua Ditionis Gallicæ regione, aut huic saltem finitima, ut in Tornacensi Flandrica, JACOBO de PARTIBUS cognita fuisse videtur (3), quippe qui exanthemata descripsit non tamquam ex *culicum* (4), sed *proprie pulicum* morfu, & di-

(1) V. Observat. 22.

(2) V. CHRIST. LUD. MOEGLING. *Disput. de Peste* pag. 7.

(3) V. *Comment. ad Avicen. prima quarti, tract. 4. cap. 2.* sic enim Auctoris locus citatur a HIER. MERCURIALI in *Pisanis Prælection. ad Histor. Epid. HIPPOCR. Histor. 2.* Namque illud Commentarium in quattuor volumina distributum, quod inscribitur *Explanatio in AVICENNAM* &c. huc usque invenire non potui. Fuit autem JACOBUS de PARTIBUS, vulgo JACQUES des PARTS, vir plane doctus & experiens, CAROLI VII. Gallix Regis Medicus, qui Tornaci mortuus esse perhibetur anno 1463.\* videlicet biennio post ejus Regis obitum. Ex quo sane intelligitur, quantum hallucinatus sit MERCURIALIS, cum in eodem loco Prælectionum suarum, quæ anno 1597. primum in lucem prodierunt, vixisse JACOBUM ante annos circiter trecentos tradiderit.

\* Ita in *Dictionario MORERII*: decessisse autem JACOBUM de PARTIEUS circiter annum 1465 in *Lindeno Renovato* reperimus.

(.) Nimirum his vocibus expressit MERCURIALIS locum Auctoris. Sed apertissime inquit MORERIUS, JA-

diversos ipsorum colores indicavit. FRACASTORIUS de nobilissimo & litterato viro ANDREA NAUGERIO meminit (1) a Serenissima Venetorum Republica ad FRANCISCUM I Galliae Regem Oratore delegato: is paullo postquam ad Regis aulam, tum in oppido Blesio (2) commorantis, pervenisset, peticulari febre correptus intra paucos dies interiiit: qui casus certe quidem gravis & improvisus contigit anno 1529 sub initium Maii mensis, quemadmodum memoriae proditum est. Itaque, iudicio FRACASTORII, pestiferum veluti seminium, sub Italico caelo conceptum, illuc detulit NAUGERIUS, cum istius luis ne nomen quidem Blesenses incolae audivissent. Ac nihil sane mirum id nobis videtur, quin etiam facile fieri potuisse intelligimus: sicuti Pedemontanis quibusdam, & nostris praesertim civibus evenit, ut cum longius hinc essent in tractus Italicos profecti, ubi maligna febris miliaris ignota erat, haec tamen ipsa, nobis jamdudum familiaris, eosdem inopinato invaserit (3). Sed tamen ex eo peculiari

*QUES des PARTS est le premier, qui a écrit de la Fièvre pourprée.* Ita verisimile est a JACOBO ipso, qui tum in Flandria, tum in Gallia medicinam fecit, ejusmodi febrem observatam fuisse.

(1) *De Morbis Contag.* l. 2. c. 6.

(2) Blesæ, vel Blethum, lingua vernacula *Blois*, nobile oppidum, quod parvæ Blesensis provinciae caput est.

(3) Ita grassantibus uspiam variolis persæpe accidit, ut

liari loco JACOBI de PARTIBUS, quem modo citavimus, suspicari quoque licet, sive in Blesensi, sive in alia regione Gallica, eundem ipsum, qui admodum frequens esset in Italia, petechialem morbum aliquando incidisse. Atque utinam in superiorum ætatum decursu, præter eos Auctores, qui de vario morborum genere observationes egregias ac perutiles nobis tradiderunt; ceteri ubique gentium Medici experientissimi, quæ rara omnino & singularia in morbis animadvertissent, eadem, ne memoria exciderent, scriptis consignassent. Quamquam non pauci, opinor, talia in adversariis descripserunt, quæ nisi per varios casus, hominumque incuriam pleraque periissent, amplificare artis nostræ historiam, atque illustrare potuissent (2). Quod si JACOBUS de PARTIBUS magnum illud commentarium posteris non reliquisset, ubi data occasione atque obiter petichularum mentionem fecit; credibile

aliqui ad effugiendum id malum, in loca quædam remota, & saluberrima secesserint, quos ibi nihilominus idem morbus tentaverit: cum interea indigenæ, ceterique habitatores ab eo prorsus immunes essent. Ac de aliis communibus morbis id etiam aliquoties observatum est.

(2) Posteaquam diversis in regionibus institutz fuerunt eruditorum hominum Societates, certisque temporibus de physicarum imprimis, & medicinalium rerum edi solent Collectanea; facile quisquam unus, non tam proprii nominis, quam publicæ utilitatis studiosus curare potest, ut insolita quæque, & memorabilia, in morbis diligenter a se animadversa, pervulgentur.



bile omnino esset, easdem in regionibus citra mediterraneum, & maxime in transalpinis, neminem unum cognitas habuisse. Fere enim Medici Scriptores in morbis iis enarrandis operam posuerunt, qui frequenter obtigissent, aut vulgares jam facti essent. quocirca variolas & morbillos quamplurimi; cetera duo exanthematum genera tantum aliqui, & potissimum Itali, exposuerunt; *Rossaliam* dico, easque pustulas cutis, quæ ab his, patria lingua, *Vairuolo salvatico*, vel *Ravaglione* appellantur. Sunt enim aquosæ & pellucidæ quasi variolæ (Crystalli propterea dicuntur) modo cum parva febris, modo nulla, atque in aliis ægrotis paucæ, in aliis, multæ, per cutem universam disseminatæ: qui morbus dierum aliquot spatio salutarem exitum habere solet. Præ ceteris Auctoribus INGRASSIA, sicuti *Rossaliam*, ita Crystallus in libro *De Tumoribus* descripsit, quippe qui tales vesiculas, præsertim Neapoli, sæpe vidisset in pueris. Nam VIDIVS quidem splendentes istas agnovit pustulas, paucisque verbis exposuit; sed tamen variolis, & morbillis, tamquam ejusmodi morborum tertiam speciem adjungendas non esse putavit: ex quo apparet eundem Auctorem neque a morbillis distinxisse *Rossaliam*, vel hanc minime cognovisse. A veris autem variolis dis-

E

similes

similes crystallos Medici satis commode, ut mihi videtur, tali appellatione disjunxerunt. Post Italos RIVERIUS de hac pustulosa corporis affectione, quæ ab Occitanis mulierculis *la Veirolette* nuncuparetur, in transcurso loquutus est, ubi nimirum *de Variolis, & Morbillis* differuit (1). Atque hæc tandem omnia de maculis, & pustulis inter se diversis, & cetera quæ dixi hætenus, etsi nimis multa fortasse videntur; me tamen ad miliarium historiam morborum, de quibus jam dicere ingredior, pædetentim, & commode perduxerunt: quin etiam aliquando mihi opus erit varias cutis efflorescentias memoria repetere, ad eas cum miliaris ob qualemcumque analogiam comparandas.

Miliaria exanthemata, quæ interdum citra febrim obveniant, cunctis fere nationibus communia esse arbitror. Hujusmodi sunt ea, quæ HIPPOCRATES, ceterique Græci Scriptores *Hidroa*, Latini Sudamina, vel sudorum

(1) Vertente anno 1719 cum Augustæ Taurinorum, & aliis in locis Pedemontanis, frequentes essent variolæ; nullæ tamen apparuerunt in Ripulensi pago, ubi complures interea pueri, & adolescentes nonnulli, dum summæ ætas erat, eaque præcalida & sicca, serosis pustulis affecti fuerunt. Hæc rubella quadam linea circumdata, liquorem in aliis ægrotis plane limpidum, in aliis subflavum & lentum, continebant, qualis nempe incisæ vesiculis manabat: plerique omnes intra hebdomadam sanabantur, aliqui vero serius, propterea quod, primis exarescentibus pustulis, alteræ similes exoriebantur.

dorum Papulas nuncuparunt. Bene autem sudaminum species ACTUARIUS facit duas (1): ex aliis, ut ipse ait, cutem scalpendo, sanguis emanat, ex aliis humor pallidus. Neque ab his differunt Arabum *Effera*, quarum duplex quoque genus a SERAPIONE constitutum est (2): vel enim, ex sanguine cholericogenitæ, rubei coloris sunt, acutæ, pungentes; vel ex phlegmate falso, quæ idcirco longe minus rubescunt. Sed generatim a fervore quodam *Sufferfuras* dicit FRACASTORIUS vulgo appellari; atque is, quem paullo ante laudavimus, auctor Siculus, a popularibus suis *Bruxoli*, vel *Brusoli*, a Neapolitanis *Migliarino*, quod granis milii per similes sint. Et recte quidem miliaris papulæ nominantur in universum, quæ inde in rubras, & albidas dividuntur. itaque de rubris, ut intelligi licet, proprie loquitur BONTIUS (3) apud Indos frequentibus, quæ, nulla febri comite, asperitatem cutis, & pruritum acerrimum inducant: addit ejusmodi malo molestissimo corripere eos, qui recens in Indiam venerint. FABIVS PAULINVS, & alii.

E 2

plu

(1) *Method. Med. l. 1. c. 23.*(2) *V. Pract. l. 5. c. 8.* Atque in eundem fere modum *Effera* describitur ab AVICENNA *Canon. Lib. 4. Fen. 3. Tr. 1. c. 13.*(3) *Medic. Indor, l. 4. c. 18.*

plures GALENI Sectatores *hidroa* (1), five pustulas, de quibus hic sermo est, ab exundante sudore fieri putant bilioso, & valde mordaci; FERNELIUS autem ab ejusdem portione humoris, qui sub epidermide coercitus per cutis spiracula evadere non queat. Miliare vero papulæ & sæpe inter sudationem, & interdum in sicco habitu corporis erumpunt. quamquam enim assiduus mador cutaneus, quasi falsugo, ad easdem ciendas idoneus stimulus sit; tamen a solo fervore, & appulsu sanguinis acrioris ad cutem, præsertim cum exterior causa quædam accesserit, facile id genus exanthemata excitantur. quamobrem ubi calida regio, vel æstivum tempus est, solent illa maxime in puerorum, & adolescentium brachiis, pectore, dorso, reliquis etiam partibus efflorescere. Et ipse quidem HIPPOCRATES, quo loco (2) febres continuas, & ardentes, tertianas, alvi profluvia, ceterasque æstivas recenset ægri-tudines, simul *hidroa* commemorat. In *Constitutione Epidemica Sempronienfi* (3), quæ obtigit anno 1701, hæc breviter a LOEWIO narrantur: cum æstuosissimus fuisset Julius  
men-

(1) Quibus valde arridet vocabulum *hidroa*, tantummodo adhibendum ab iis videtur, cum papulas ichore plenas intelligi volunt.

(2) *Aphor.* 21. *sect.* 3.

(3) *V. Histor. Epid. Hungar. in Append. ad Vol. I. Act. Acad. Cæsar. &c.*

mensis, exortæ sunt tertianæ febres non diuturnæ; intereaque multi exanthematis miliaceis, valde molestis, non pueri modo, sed adulti quoque & senes corripiebantur; quæ facile tamen per pharmaca refrigerantia, & balneum evanescebant. Memini me aliquando, fervente anni tempestate, nobilissimam Virginem, sanguinei & calidi temperamenti, cum insolita corporis vel animi agitatio nulla antecessisset, sed vespertina tantummodo, ac frigidula lenis aura spiraret, rubellis illico papulis miliaceis omni ex parte affectam fuisse: hæ autem postero die, ut citra sudorem advenerant, ita penitus abierunt. Sed ea multo difficilius discuti ac resolvi solent exanthemata, quæ a diathesi humorum scorbutica originem ducunt: talia scilicet in cute diutius inhærent; vel, cum recesserint, subinde revertuntur (1): ita impuræ & pravæ materiæ, quæ inimica est sanguini, & visceribus, pars aliqua ad corporis habitum vi quadam propria naturæ impellitur.

Variolosæ quoque pustulæ, quæ humano generi tantam sæpe afferunt perniciem, vi-

E 3

fæ

(1) Hujusmodi quidem papulæ generatim rubent: verum illæ etiam fortasse ab ingenito sero scorbutico fiunt, quas in modum vesicularum, aquam continentium, infantibus familiares esse Germanus quondam tradidit Medicus HÆFERUS in *Hercule Med.* l. 7. c. 6.: de quo auctore postea dicemus.

sz sunt interdum sine manifesta febris prodire, augeri, maturefcere, ac plane ficcari. qualium se fpectatorem fuiffe variolarum DRELINCURTIUS affirmat (1) tum fporadicarum, tum popularium: atque in hanc rem fimilia quzdam exempla a FORESTO defumpta, EPIPH. FERDINANDO, JOH. RHODIO, & aliis in medium adducit. Idemque nobis conftat de purpureis maculis, quz tamen in febribus acutis peftiferz generatim funt appellatz. In decurfu hiemis (annus erat, ni fallor, 1705) peticulares febres in hac urbe fuerunt admodum multz, ex quibus graviter laborantes in publica Pauperum hospitali domo viros, & adolefcentulas plures confpexi: harum interim aliquz, valetudinis incommodum vix ullum percipientes, confperfa maculis brachia, initio purpureis, deinde fublividis oftendebant; ac tales aliis in partibus a fe deprehenfas fuiffe dicebant: paucorum autem dierum fpatio univerfa cutis zquabilem colorem nativum recuperabat. Etiam PETRUS a CASTRO (2) peticularum citra febrem efflorefcentium meminit. itemque BURSERUS, in libello *De Febre Petechiali*, Ananbergenfes (3) aliquot fe

vi

(2) In *Difert. de Variolis, & Morbillis*.(1) *De Febr. Punctic. Sect. 3. Aphor. 32.*

(2) Annaberga oppidum eft Superioris Saxoniz in monte Schneeberg fitum.

vidisse scribit, maculis omni ex parte corporis infectos, neque tum eos decumbentes, neque ullo symptomate afflictos.

Nunc de papulis miliaceis dicamus, quæ febribus aliquando intermittentibus adjunctæ sunt, plerumque vero continuas comitantur, idcirco miliares proprie nuncupatas. Ubi *Constitutionem Epidemicam anni 1720* exponit BERNERUS (1), tertianas in Agro Clivienfi vagantes commemorat, quibus ineunte anno corripì cœpissent incolæ: omnino molestæ fuerunt hæ febres, cum exanthematis tota ægrotantium cute diffusis, tum rubris tum albidis, quæ postquam evanuiscent, alia continuo erumpebant: illæ porro simplices tertianæ in duplices, vel diarias transibant. In Additamentis ad RIVERII *Observationes* quamdam legi narrationem febris tertianæ duplicis, cujus vehementes accessiones, & oborta simul exanthemata urentia ægrotum ita vexabant, ut de vita ejus timendum esse videretur: sed experientis Medici opportuno consilio facta sanguinis missio peracerbum id symptoma, æque ac morbum, illico sedavit; atque æger brevi est sanitatem consecutus. Sæpe enim ferventium humorum, qui tales papulas, perinde ut eas

E 4

fe-

(1) V. Librum Auctoris *De efficacia, & Usu Aeris &c.* §. 48.

febres, producant, analogia quædam esse videtur: quod utique cum eo convenit monito AVICENNÆ (1): *Quum Effere invadit locum amplum* [sive cum latius pustulæ sparguntur] *tunc si non fiat phlebotomia, timeatur febris tertiana.* Apud nos acutæ febres miliares non raro ab intermittentibus initium ducunt: sed tamen veræ etiam tertianæ sunt aliquæ cum hisce papulis consociatæ, vel sponte sua desinentes, vel per corticem peruvianum, aliudve idoneum remedium, sanabiles: in quo nihilominus adhibendo cortice interdum hæsitant Medici, sub ejusmodi febrium aspectu latere virus illud malignum suspicantes. Idem fere de peticulis observatum est, quas PETRUS a CASTRO (2) se vidisse affirmat in tertianis, sive intermittentibus, sive continuis. Et paucos ante annos in hac urbe adultum hominem ægrotasse scimus ex tertiana simplici cum peticulis lividis, eumque convaluisse. Verum de hisce febribus satis sit: ad eas progrediamur, quæ proprie sunt miliares; & primum de genere benignarum, post accuratius de acutis, & malignis dicemus.

In febribus æstivis, inquit HIPPOCRATES (3), *circa septimum, octavum, & nonum diem as-*  
*predi-*

(1) Canon. l. 4. Fen. 3. Tr. 1. c. 13.

(2) Loco paullo ante citato.

(3) Epidemior. lib. 2. sect. 3.



*predines quadam miliacea, culicum morsibus fere similes, quæ tamen non admodum pruriebant, in summa cute subnascebantur, & ad judicationem usque perdurabant. Ac ne eæ quidem masculorum ulli eruperunt. Mulier vero, cui talia fierent, nulla mortua est: hebetiori tamen erant auditu, & soporosa, quamvis antea non admodum soporosa essent, quibus ista evenire debebant. Hunc locum HIPPOCRATIS non satis attendisse videtur in commentariis suis VALLESIUS. Etenim asperitates illas miliares, culicum morsibus similes, putavit maculas esse, nimirum peti- culas, Tabardillo ab Hispanis nuncupatas (1): qui morbus initio rarissimus, nec multis ante annis, quam hæc litteris consignaret VALLESIUS (2), frequens in Hispania factus, ortum ibi suum, simul & nomen habuisse dicebatur. itaque ex eadem sententia subjungit auctor, in maculis diverse coloratis differentiam malignitatis morbi positam esse, ut cum nigris aut lividis vix ullus evaderet,*

*cum*

(1) Non modo petechiales, sed aliæ quoque febres acutæ vulgo *Tabardillos* ab Hispanis hodie vocantur, ut in opusculo alibi citato adnotavit BURLÆTUS. Illi autem, opinor, de *Tabardillo*, sicuti nostrates de miliari morbo, facillime suspicantes, quasi præsentem eum ipsum adspicere sibi videntur, statim ac febrilis ægritudo quadam, eaque gravis, apparet.

(2) Auctoris Commentaria in Libros Hippocratis de Morbis Popularibus primo Madriti prodierunt anno 1577.

*cum rubris pauci admodum interirent. Omni-*  
no autem perspicuum est, nec de pravissimis  
huiusmodi febribus HIPPOCRATEM meminisse,  
sed æstivis tantum; neque de talibus macu-  
lis, sed de miliaceis, aut culicaribus papu-  
lis (1), quibus solæ mulieres afficerentur ,  
ita

(1) Ab aliis quoque Medicis miliares, aut culicæ papulæ cum rubris purpureisve maculis, ideoque & miliares febres cum petechialibus confundi solent; unde is in quædam Lexica error manavit. In Vocabulario universali Gallico-latino vera quidem invenitur descriptio febris miliaris: quod autem ibi additur, eandem febrim alio modo purpuream dici propter eas, a quibus nomen accepit, exiguas pustulas, vulgo *Pompre*, hoc sane probari nullo modo potest. Insuper exanthemata, quæ papulas aut pustulas, interdum vesiculas, nuncupare consuevimus, ibi latine definiuntur *Purpurei vari pestilentis febris*; id quod rejiciendum omnino videtur. primum enim rubicunda sunt illa, vel albida, vel instar chrystalli pellucida: deinde Varus aliud quiddam in Pathologia significat: *Varus*, inquit FERNELIUS, *tumor est durus, & exiguus, ex frigido crassoque humore, quasi in callum concretus*, isque ut plurimum oritur in facie\*: denique miliares papulæ neque in continuis tantum, in acutis, in malignis aut pestiferis, sed aliquando intermittentibus, benignis continuis, etiam tardis, quas *chronicas* vocant, febribus observantur.

Et ipsi quidem Auctores Lexici Medici, quod *Amaltheum* inscribitur, in ejusmodi errorem lapsi sunt. Nimirum exanthemata in Morbis epidemicis ab HIPPOCRATE memorata, culicum moribus similia, eadem esse volunt (V. *Culex*) ac maculæ, quæ a Medicis recentioribus *Petechiæ* sunt appellatæ: hæ vero pulicum moribus, non culicum, assimilantur; quemadmodum vel in ipso *Amaltheo* scriptum est in voce *Petechiæ*. Ceterum exanthemata, quæ indicavit HIPPOCRATES, parum ab iis differre puto, quorum in Atticæ pestilentis Historia meminit THUCYDIDES: *Corpus*, inquit, *exterius non admodum fervens tactu erat, neque pallidum, sed subrubrum, fuscum, minutis pustulis ac papulis scatens*: sic enim hunc locum interpres au-

ita ut omnes tamen ægroræ convalescerent. Itaque VALLESIUS, uti dicebam, cum singula HIPPOCRATIS verba minus consideraverit, in ejus loci interpretatione hallucinatus est: quod utique erudito, & magni nominis Scriptori Medico ignoscendum. ecquis enim est tam excellenti ingenio, doctrinaque præditus, ita sollers, ita sedulus, atque intentus ad omnia, ut lectitando, & multum scribendo, nihil eum fugere umquam possit? Nunc quoniam de miliari morbo agentes, in hunc de Hispanis sermonem ingressi sumus, ad cetera pergamus eodem spectantia, inde ad alias nationes progrediemur.

Ab hinc annis prope viginti cum artis Medicæ peritissimos viros, Madriti commorantes, de febribus miliariis percontatus essem per litteras, quod singuli responsum mihi dederunt, brevissime narrabo. Scilicet in toto Castellæ tractu, ipsaque in urbe Ma-

dri-  
ctoris, vir doctissimus, convertit e græco LAURENTIUS VALLA.

\* Variolæ, aut Varioli a Varis nomen traxisse videntur, quam vocem latini quondam Scriptores in artem medicam introduxerunt: idque vocabulum plures apud gentes ita receptum est, ut litteris non valde immutatis, aut aliquo adjuncto, vernaculum fecerint: Itali *Vaiuolo*, Galli *petite Verole*, Hispani *Viruelas* vocant. Nunc igitur illa eadem nomina, jamdudum attributa certis quibusdam morbis, haudquaquam ad alios recentius cognitos transferenda sunt. ac nemo quidem unus ex Medicis, ut arbitror, pustularum miliarium appellationem a variolis, multoque minus a varis, mutuandam esse censuit.

drivenfi febrem proprie miliarem, seu veficularem, & malignam omnino raram, nec umquam popularem effe HIGGHINS Anglus, & CERVI Parmenfis fignificabant, primus Hispaniæ REGIS Archiater, alter REGINÆ Medicus: quod idem a BUONCUORE Neapolitano (1), Medico Regio, erudito & officiofiffimo viro comprobatum erat. Minimeque ab iis diffentiebat Aulicus etiam Medicus AQUENZA, qui febrem miliarem neque in urbe, neque in Castellana regione cognitam fibi fuiſſe ullam declarabat: aliquando tamen in aliis provinciis, ac verno præſertim tempore, quafdam vagari febriculas cum veficulis cutaneis, aquoſo humore plenis, & illas quidem benignas, unius vi naturæ ut plurimum ſanabiles. Denique experientiſſimus PERALTA raro affici miliaceis febribus Hiſpanos teſtabatur, neque ex iis ægrotantes in vitæ diſcrimen adduci: quibus propterea curandis febribus ob vaſorum plenitudinem opportuna eſſet detractio ſanguinis, & nonnumquam leniſſima diaphoretica adhiberentur. Atque hæc de tali argumento præcipua ſunt, quæ tum temporis ex Hiſpania accepi. Iam ipſa nos admonet regionum proximitas, ut ad Luſitanum celebrem Me-

(1) FRANCISCUS BONCORIUS, nunc Medicus Primarius CAROLI Regis utriuſque Siciliæ, atque in uni-verſo Regno Neapolitano Archiater.

Medicum, ZACUTUM adeamus: ecce autem in *Praxi* ejus *Admiranda* occurrit singularis Observatio quædam *De Febre Efferoſa* (1) ab eodem, ut opinor, Olyſſiponæ habita; qua in urbe tricenos annos commoratus fuiſſe dicitur, priuſquam in Hollandiam veniret (2). Nimirum pueruli duo ex febris continua, dolore capitis, & laſſitudine laborabant: nocte affatim erumpunt ad cutim puſtulæ, quas ipſi poſtero mane ſcalpentes diſrumpunt; atque ab his ichor tenuiſſimus emanat: qui adſunt ægrotis Medici quatuor, variolarum ſpeciem eſſe arbitrantur: interim ex calido regimine irrequieti exardeſcunt pueri, pruritu vexantur, & novæ comparent veſiculæ, primis jam exſiccatis: tum arceſſitus ad eos ZACUTUS diverſi cujuſdam generis puſtulas, videlicet *Efferas*, demonſtrat, ex ichoroſo ſanguine, quales potiffimum æſtivo tempore, & in bilioſis corporibus, exoriri ſoleant: itaque detrahi ſanguinem jubet, piſanam dari, & cetera fieri, quibus illi optime convaluerunt. Quod ſiquis diceret ejuſmodi caſum potius in Batavia eveniſſe, ubi vitæ ſuæ tempus reliquum exegit ZACUTUS; ſaltem

Au-

(1) *Obſervat.* 16. l. 3.

(2) ZACUTUS e Luſitania decedere, propterea quod Judæus eſſet, circiter annum 1624 PHILIPPI IV Regis edicto coactus fuit: quare in Hollandiam ſe recepit, ubi medicam artem, maxime Amſtelodami, profeſſus eſt, & admodum ſenex interiit.

Auctoris hæc eadem observatio plane consentiret cum altera FORESTI, quippe qui medicinam apud Batavos diutissime facitavit, ac talia exanthemata in æstu caniculæ, præsertim pueris, modo cum febris, modo sine febris, infesta esse tradidit. & Scriptor uterque cavendum esse admonet, ne victus, aut remediorum usu perverso idem morbus ingravescat: verum hæc opportunius alio loco exponemus. De miliariis febribus in universum rogatus aliquando a nobis Medicus Professor in Academia Lugduno-Batava OSTERDIKIUS, perpauca se vidisse respondit, easque benignas; quibus idcirco nec sanguinis missionem, neque alia medicæ artis auxilia, præter diluentia, & mitissima diaphoretica, adhibuisset. Leves etiam in Gallia febres dicuntur esse cum rubris exanthematis, quales item puerperis nonnullis superveniant. Itali Scriptores, sicuti de papulis miliaceis citra febrim, ita de iis cum febris conjunctis mentionem fecerunt, in primis MARTIANUS, ubi locum HIPPOCRATIS illum, de quo supra diximus, interpretandum aggreditur: sæpe enim papulas in febrili fervore se observasse perhibet, sudaminibus fere similes, vel minutis tuberculis, quæ a culicum morfu excitantur: cujusmodi exanthemata fuerunt aspredines cutaneæ ab

HIP.

HIPPOCRATE memoratæ. ac talia recenter in quadam muliere se adnotasse affirmat, quæ ardente febre, cum aliqua mentis alienatione, & alvi fluxu laborabat: idemque addit, papulas id genus a sero falso & bilioso fieri, maximeque mulieribus, ac pueris evenire. hæc scilicet eximius iste docuit HIPPOCRATIS interpres. De studioso quodam atque erudito viro, Pisfis commorante, in suis ad me litteris narrabat olim ZAMBECCARIUS, illum nempe ex vehementi commotione animi in continuam febrem incidisse, simul in exteriori toto corpore pustulas rubentes, granis milii perfimiles, apparuisse: ob sanguinis fervorem, & cutanei humoris mordacitatem aliquoties incidi venam jussit ZAMBECCARIUS, & aquam fontanam liberaliter bibendam dedit: morbus admodum remisit, sed aliquandiu, cum esset hibernum tempus, perduravit. Cetera omitto, quæ mihi alias ab excellentibus inter Italos Medicis de hoc genere morbi miliaris minime perniciosi denunciata fuerunt. Quondam in hac urbe mulierem, ætate florente, optimoque corporis habitu, invisi, quæ biduo post editum puerum, unde larga sanguinis effusio consecuta erat, cutaneis sparsim affici papulis rubentibus cœpit: pulsus vix febrilis; leviculus dolor capitis; affidua

dua diaphoresis: die tertia subviridia ventris excrementa; urinæ saturæ; postmodum alvus constipata; uteri purgamenta semper mediocria; noctu molesta cutis prurigo: nihilominus ad multas horas quotidie in lecto sedebat hilaris femina, cibi appetens, pallio lo dumtaxat ex panno lineo contexta; tunc enim Augustus erat mensis, & quidem fervidus: de reliquo victus rationem accurate servabat; identidem oleo dulcium amygdalarum, & continenter diluente potione utebatur: duodecim fere dierum spatio convaleuit, ac decidentibus cuticulæ squamulis nativum corporis exterioris habitum recuperavit. De alia memini juvene primipara, quæ partus die postero pauculam quietem habens, subinde etiam (cum alioqui vix febricitaret) pectoris angustia premebatur: hinc brevi pustulæ miliares, partim rubræ; partim albidæ, comparuerunt; ex quo magnum levamen ægrota percepit, septemque dierum spatio sanitas ei restituta est (1). Sed etiam ex perlucidis pustulis, aut vesiculis, quæ dicuntur crystallinæ, cum parvula febris, nulloque gravi symptomate, homo quidam maturæ ætatis laboravit: qui morbus dolore articulorum superveniente (nam ille

(1) Hujusmodi febres miliares identidem a nostratibus Medicis observari solent, intercadum aliæ graves & malignæ passim vagantur,



ille alias arthriticus fuerat) salutarem exitum habuit. Ceterum de albidis pustulis, quas natura deteriores esse rubris Auctores multi prodiderunt, scire licet interdum eas toto corpore non abundanter diffundi, sed per aliquas tantummodo partes magnis intervallis dispergi, ita ut ægrotantes ne gravi quidem feбри, neque molestis symptomatibus afficiantur: atque id ipsum omnes quidem norunt in variolosis affectionibus (1) aliquando evenire.

Quamquam vero hi miliares morbi, per se ipsi mites, nullum vitæ periculum afferre videntur; tamen ex neglecta victus ratione confestim ingravescere possunt; quemadmodum FORESTUS (2) vertente anno 1556 observavit in duabus puerperis, quæ papulas rubentes, velut ex culicum morfiunculis habebant. Primam nempe a suscepto frigore incidisse dicit in dolorem stomachi, cardialgiam, defectionem animi, cum pulsu debili, & angustia præcordiorum: quæ nihilominus symptomata, vi medicaminum denuo propulsis ad cutem exanthematis, paulatim evanuerunt. In altera, quæ verno tempore puerum ediderat; hinc bene omnia processerant

F

serant

(1) Variolæ scilicet illæ sunt, quas Galli vocant *Petite Verole volante*. V. COL DE VILARS *Diction. de Medecine* &c.

(2) *Observat. lib. 6. obs. 60.*

serant, post duas a partu hebdomadas, inopinata eruptio facta est rubrarum papularum; atque hæc etiam puerpera, admissi frigoris causa, & repressis pustulis, in eadem fere, ut illa prior, affectiones incurrit: tum vero FORESTUS idoneis pharmacis revocare papulas ad cutem conatus est, id quod bene ac prospere successit. HÆFERUS, in Aula Cæsarea quondam Medicus, exanthemata quædam commemorat (1) morbillis similia, quæ pueros, & constantis quoque ætatis homines in decursu hiemis, & insequentis veris (2) divexabant: his adjecta erat febris continens, quæ altero die, vel ad summum tertio, desinebat: itaque brevi omnes sanabantur, præter Ancillam, quæ de rebus domesticis valde sollicita, frigido aeri sese commisit: huic enim oborta est difficultas spirandi, compressio cordis, lassitudo gravis, ut in magno vitæ periculo

(1) V. *Hercul. Medic. lib. 7. c. 6. De Infantium Affectib.* Auctor in hoc Volumen *Locorum Communium* præcepta & observationes præstantium Medicorum, & proprias contulit; idemque opus emisit ipse in lucem, quod semel & iterum post ejus obitum Germani ediderunt. Fuit autem HÆFERUS Frisingæ natus, vir studiis deditus, & in arte sua multum versatus. Javarinum, Inferioris Hungariæ oppidum ab IMPERATORE missus ad Præfidiarii Medicum munus fungendum, ibi supremum diem obiisse scribitur A. 1661.

(2) Hæc scilicet Viennæ habita esse observatio videtur anno 1634, ut ex iis colligi potest; quæ prius ab Auctore tradita sunt in eodem cap. 6.

lo eadem versaretur: sed tamen ad accuratam dietam continuo redacta, simul diaphoreticis utens pharmacis, paulatim convaluit.

Quod si hujusmodi ægritudines, suapte natura leves, ob aliquod erratum in victus ratione periculosa fiunt; facile quisquis intelligit, tum eas profecto gravissimas fore, cum peculiaris quædam insita sit humoribus pravitas, quæ maxime solet in ipsis pustulis inhærere. Quapropter in illa Observatione de puerperis duabus paullo ante citata, præcipit FORESTUS ad tales papulas magnopere attendendum esse, quæ, si retrocesserint, aliquando syncopem, & subitanæ mortem afferant: quemadmodum evenisse dicit uxori Henrici Duystii, quæ subito extincta est: tales igitur oportere puerperas diligenter custodire. Sed insuper ZACUTUS, ubi *Effersant Febrim* exponit, de qua loquuti jam sumus, notabile documentum illud subjungit: *Tu vero*, inquit, *in opere practico hanc Effera curationem bene observa, in cujus præfatio, & curatione non solum secundæ, sed etiam primæ notæ Medicos misere deceptos sæpeprehendi.* Ex quibus colligere licet, miliares morbos, sive mites re ipsa & benignos, sive fraudulentos & feros, apparuisse jampridem in Batavia: tamen si mali-

gnum ejusmodi nullum in ea regione se vidisse BOERHAAVIUS in quadam Epistola (1), quæ penes me est, declaraverit: & supra lau-

(1) Hanc BOERHAAVIUS epistolam ad Medicum & collegam meum dedit: & quia malorum puerperis obvenientium singularem ibi quamdam ætiologiam tradidit, hic mihi visum est ab eadem epistola totum illud caput apponere. Quæstio autem erat, num Batavæ mulieres a partu inciderent aliquando in acutam febrem miliarem; atque ita vir ille clarissimus respondebat.

Morbum, de quo scribis, non memini vidisse inter nostrates, neque puerperis aliquid singularis mali accidere, quod & referri poscat. Quoties mulieribus, recta prius valetudine fruentibus, puerperii mala oborta vidi, toties fere semper ea contingere vidi ex sanguinis corde expressi itinere in vacuas, laxas arterias, in abdomine sitas; quæ paullo ante partum a mole Fœtus, aquarum, & secundinarum, adeo compressæ fuerant: quippe tunc cerebrum, nervi, spiritus suis in actionibus mirifice turbari, nulle morbi species formare, & inani malignitatis specie terere, nimis ubique deprehendi. Hæc tamen omnia vitari didici si adductis latis fasciis constrictus venter comprimit ita arterias, ut æquabilis sit pressi sanguinis actio æque ad superioris, quam inferioris aortæ ramos ipso temporis articulo quo collabitur, onere liberatum distendente, ablatum. Videbitur fortasse parum pertinere tua ad quæsitum responsum. Vidi tamen hac unica natos causa morbos etiam maculis malignis trulentos, falsoque suspectos pestilentialis labis: ut velocitatem talium intellige morborum anomala symptomata, maculasque corpore diffusas. Hæc sunt quæ dicere potui ad proposita. si inde ignorantiam nudaverim meam, tamen gaudebo, si vel ob sinceritatem placuero. Vale! Leydæ die 14. Jul. 1730.

Qui novam hanc hypothesim animo attenderint, eamque sive plurimi, sive admodum pauci probaverint; certe quidem omnes candorem & modestiam hominis doctissimi, & ubique gentium celeberrimi, valde commendaturos esse arbitror.

Ceterum ejusmodi ætiologiam, simul & rationem tuendi a morbis gravissimis puerperas per cingula ventrem comprimentia, non modo nobiscum privatim communicavit BOERHAAVIUS, sed etiam publice docuit. V. *Prælect. Acad. in propr. Instit. Med. §. 686.*

laudatus OSTERDIKIVS in perſcripto ad nos Conſilio teſtatus ſit, perpaucas febres miliares, & eas quidem benignas, ſpatio annorum triginta quattuor, ſe deprehendiſſe. Neque enim, ut ante dicebam, ex repreſſis modo puſtulis, cum benigna febris eſt, periclitantur ægroti; verum etiam miliaris morbi ſpeciem illam per ſe malignam, inſeſtamque humano generi, jamdiu Medici obſervarunt.

Hoc autem aliis in regionibus frequens eſt malum, ac velut endemium, in aliis quamplurimis ignotum eſſe dicitur, ut præter ceteras de Gallicanis maxime Provinciis, ipſique Galliæ finitimis, tum de pleriſque Italicis, audivimus. Attamen vir doctus & experiens CAROLUS PISO (1) cutaneas quaſdam affectiones, inſtar hydatidum, exponit, quæ univerſo corpore diffuſæ, continentes febres non raro comitentur. deinde ſingularem enarrat morbum nobilis Pueri, ſynochæ putri laborantis, cum laſſitudine, dolore capitis & dorſi, ſummaque pectoris an-

F 3

guſtia

(1) V. *Obſervat. & Conſilior. ſect. 5. cap. 4.* qui primo liber editus fuit An. 1618. Vixit autem CAR. PISO, celeberrimi NICOLAI filius, ætate illuſtrium Medicorum Parienſium, LUDOV. DURETI, SIMON. PIETREI, & PETRI SEGUINI, quos idem præceptores ſuos appellat. Conſiliarii & Medici munere perfunctus apud HENRICUM I, Lotharingæ Ducem, Nanceii deceſſiſſe creditur A. 1633.

gustia, ut prope suffocari videretur: quartum circiter diem accessit vigilia, & delirium, ac tota maculis conspersa cutis apparuit; ubi exortæ sunt vesiculæ prurigino-  
sæ, non desinentes in acumen, sed in latitudinem protensæ, exteriore corporis habitu intumescente: apertis vesicis humor aquosus effluebat, quæ postea exsiccata in furfures abierunt. Anomalias hujusmodi pustulas, diversamque formam vel ex toto, vel ex parte habentes, nonnunquam iis in febribus cernere licet, quæ natura miliares sunt. neque tantummodo ex plurium conjunctione pustularum fieri corpus unum vesiculare animadvertimus; sed etiam per se, potissimum in manibus, vesicas, tamquam ex ambustione, excitari, quas opus erat incidere, ut acer humor emanaret. pustulas autem grandioribus variolis similes persæpe conspeximus (1). Cum Gratianopolim venisset

(1) Ipsarum quoque Variolarum quanta sit diversitas, nemo ignorat, quarum multæ species hac ætate a Scrip-  
toribus enumerantur; præter singulares quasdam, etiam in benignis, anomalias, quæ rarius contingunt, ut in magnitudine aucta, vel admodum imminuta. KOLICHEN \*  
puerum Æthiopem, qui ante sex menses in Daniam pervenerat, variolis affectum, eodem ibi tum grassante morbo, curavit. universum pueri corpus, excepta facie scatebat pustulis adeo minutis, & in ea parvitate ad finem usque morbi permanentibus, ut milii semina non æquarent; tantumque in manibus & pedibus paullo majores erant: materfamilias, ægroti custos, KOLICHENIO narrabat id

nisset RIVERIUS anno 1630, ad ægrotum adolescentem accitus fuit (1): hic, annum agens vigesimum, ex acuta febris gravissime laborabat, cum purpureis maculis: die morbi decimo sexto plurimæ circa vesicatorium pustulæ, quasi variolæ, tum aliæ per dorsum, lumbos, & nates apparuerunt; quæ postridie prope omnes disruptæ sunt, atque evanescere cœperunt: interea minimarum, & innumerabilium vesicularum, quæ limpidum humorem continebant, in toto pectore, & hypochondriis, eruptio facta est; simul febris atque delirium remisit, quin etiam æger posteris diebus omne fere tempus dormiendo exegit: itaque erumpentes pustulæ, morbo jam valde provecto, salutares fuerunt. Ceterum miliares febres perniciosas cognovit profecto RIVERIUS: ubi enim de *Febre pestilente* sermonem habet, initio ponit a purpureis maculis exanthemata differre, quod illæ, nullo modo elatæ, ad mutatas cutis qualitates; hæc vero ad tu-

## F 4

mo-

plane ipsum a se conspectum fuisse in puella Æthiope, quæ pustulis quoque immunem omnino faciem habebat. Insuper de puero illo adnotavit Auctor, siccatis primis variolis, erupisse alteras, ac deinde tertias, easdemque perpetuo minimas; atque hanc propter causam longiori tempore Æthiopem suam, quam Europæi soleant, ex variolis decubuisse.

\* V. Medic. Septentr. Collat. Tom. 2. p. 224.

(1) V. Observat. 21. Centur. 1.

morum classem referantur (1): porro exanthemata esse aliquando varorum magnitudine, alias minora, & granis milii similima: tum alia rubra, tamquam ex sanguine genita, aliaque alba ex sero, vel pituita; deinde ceteras earum varietates persequitur. Et quoniam minime insolens est, ut cum alius generis exanthematibus conficiuntur miliaria, doctissimus HELVETIUS (2), ubi distinctarum ex prava qualitate variolarum secundam speciem describit (3), perpauculas dicit in corpore variolosas pustulas, & procul alias ab aliis esse dispersas, ut sæpe tres quattuorve in brachio reperiantur: sed tamen exilium vesicularum, pellucido sero turgentium, pluribus in partibus, maximeque in pectore incredibilem numerum inveniri, quæ inæqualem asperamque cutim efficiant. quamobrem animadvertit principalem hic morbum censerì malignam

fe-

(1) Solent quidem Medici exanthematis vocem, a Græcis metaphorice inductam, ad omnia quæcumque germinant in cute, aut efflorescant, sive in speciem macularum, sive pustularum, adhibere; tum adjectivo nomine apposito ambiguitatem tollere: quod tamen a paucis fit, nec semper ita fieri potest, ut nihil ambiguum remaneat. sed amphiboliam iustulit omnino RIVERIUS, cum alterum vocabulum ab altero, nempe a maculis exanthemata distinxit.

(2) E Regia Scientiar. Parisiensi Academia; REGINÆ Galliarum Medicus Primarius &c.

(3) *V. Observations sur la Petite-Verole, Tit. Des Petites-Veroles Discrettes.*



febrim debere, & variolosa tubercula tantum pro symptomatis habenda esse. Rectum ille quidem hac de re iudicium tulit: si veroliceret ejusmodi morbum a præcipuis, exanthematis denominare, aliqui fortasse miliarem potius febrim, quam variolosam dicerent. Sed ista mittamus, quæ in utramque partem disputabilia videri possunt; ac de certis exploratisque miliaceis febribus, quæ sub ipso Galliæ cælo acciderunt, sermonem prosequamur. Nobilis Adolescentis funestam ægritudinem ita exponit Cl. QUESNAY (1): corripuit eum febris, quæ, principio mitis, adjunctum habebat alvi fluxum valde foetidum: septimo die accessio febrilis adhuc modica, octavo gravis, nono gravissima, cum anxietate, & spasmodicis in carpo commotionibus tendinum: ad diem usque vigesimum primum hic rerum status; quo die rubentia exanthemata toto corpore apparuerunt, quæ continuo parvularum formam vesicularum, ichorem continentium, nacta sunt, ac biduo post æger decessit: ex ore cadaveris, velut ex loco gangræna affecto, multa sanies manavit. Perspicuum est maximam hic humorum pravitatem & corruptionem existisse, quam putidum illud alvi profluvium inter initia indicavit, tum hæc

ipsa

(1) V. *L'Art de Guérir par la Saignée*. Sect. 2. c. 1.

ipsa modo memorata sanies patefecit : & cum fera pustularum eruptio, inclinante scilicet morbo, utilis esse soleat, huic tamen ægroto jam fere ad extremum adducto prodesse non potuit. Illud autem longe notabilius est, quod idem auctor de febre quadam epidemica, & revera miliari enarrat (1): nimirum in pago, lingua vernacula, *Freneuse* nuncupato, qui a Medunta (2) paucis milliariis distat, sub æstatis initium popularis incidit febris acuta, cujus comes erat sudor modicus, ac fere perpetuus: die morbi altero, vel tertio prodibant undique ad summam cutem exigua & rubra exanthemata, quæ inde in albidas, & milio æquales pustulas, limpidi humore plenas, convertebantur: etsi febris vehemens non esset, ægri tamen peracri & urente calore afficiebantur: mente constare soliti erant, nec de capite conqueri; solum oculos fulgentes, & lacrymali humore perfusos habebant: qui declinare mortem non poterant, aliquanto prius febrilem æstum vehementiorem patiebantur; tum agitationes membrorum una cum delirio accedebant, iidemque paullo post interibant: cadaverum tantus erat fœtor, ut, ea quamprimum fieri posset, in sepul-

(1) V. in eodem libro caput inscriptum *Fievre Pourprée*.

(2) Gallice *Mante*: oppidum est ad Sequanam, in Insula Franciæ, sic appellata.

pulcro condi solerent. De remediis, quæ a principio grassantis morbi noxia, ac de iis, quæ postmodum utilia fuisse perhibentur, fortasse alius erit opportunior aliquando differendi locus. Jam pergamus ad ea breviter exponenda, quæ de hoc febrium genere Scriptores Itali prodiderunt, vel qui aliquo in tractu Italiæ, aut huic finitimo, medicam artem professi sunt, præter alia, quæ a nonnullis per litteras, vel auditione accepimus.

RODERICUS a FONSECA, primum in Pisano, tum in Patavino Gymnasio Medicus olim Professor (1), hominem quemdam acuta febris afflicto commemorat, cujus pectus, die quarto, itemque dorsum *asperitatibus miliaceis* plane rubris opertum fuit: atque animadvertit auctor id malum pro novo & inaudito habendum non esse, utpote quod in Corsica Insula prius comparuisset. Confundit autem, ut VALLESIUS, & alii fecerunt, ejusmodi exanthemata cum peticulis, quæ scilicet in Corsica, in Cypro, & alibi jampridem observatz fuerant. Qua in re is minime hallucinatus est, qui ante FONSECAM, & amplius ducentis abhinc annis, de *Febre pestilente* librum evulgavit NIC. MAS-

SA

(1) V. Auctoris Opusculum, quo Adolescentes ad Medicinam facile capiendam instruuntur &c. pag. 61. edit. Florentiæ A. 1596.

SA: non enim maculas tantum, sive peti-  
culas, sed eminentes quoque papulas expo-  
nit, quæ pruriginosam & asperam cutim  
efficiunt (1). ac febres quidem omnes, in  
quibus talia in exteriori corpore efflorescant,  
dissimilem formam habentia, uno eodemque  
capite ideo se comprehendere dicit, quod  
cunctis id genus morbis communis sit pesti-  
fera qualitas. Sed qui MASSAM ætate con-  
secutus est, vir doctus & experiens, PETRUS  
SALIUS, memorata exanthemata accuratius  
distingxit a peticulis, eorumque differentias  
tradidit (2). alia nimirum alba esse docet,  
alia rubicunda; item alia seminis milii ma-  
gnitudinem non attingere; alia saltem exæ-  
quare, & nonnulla etiam excedere; deni-  
que modo pauca, modo plurima, & inter-  
dum innumerabilia esse, ut locus in cute  
vix ullus a papulis vacuus reperiatur. Hisce  
auctoribus annumerari potest ROBORETUS,  
qui peticularem febrem Tridenti grassan-  
tem anno 1591 diligenter enarravit. ubi  
enim macularum differentias persequitur,  
pustulosa quoque exanthemata agnoscit, in  
quibus tamen designandis communi peticu-  
larum nomine abutitur: idcirco duplices pe-  
ticulas facit; ab aliis cutem non elevari,  
ne-

(1) *Traſſat.* 3. c. 4.

(2) *Traſſat.* *De Febre Peſtil.* &c. c. 18.

neque inæqualem asperamque reddi; alias vero, quæ rarissimæ sint, exiguum instar tuberculorum esse demonstrat, vel exilium variolarum. Sed multo sane melius ceteri, qui pulicarem febrim a culicari separaverunt; quamquam inter utramque speciem proxima cognatio sit. Et PETRUS quidem a CASTRO (1) tametsi alteram paullum differre ab altera censeret, attamen ejusmodi malignas pustulas ad culicarem febrim retulit. Atque hic adnotare licet, non eos modo auctores, quorum meminimus, sed in primis HIPPOCRATEM comparavisse culicum moribus exanthemata illa, quæ ipsemet aspredines miliaceas nuncupavit. Quamobrem suspicari quispiam posset, quibus in ægrotis, ut in *Fullone*, in *Pherecide*, in *Euphranoris filio* (2) pustulas veluti culicum morsus idem commemorat HIPPOCRATES, has etiam ad genus miliarium quodammodo pertinere. Sed apud AETIUM quiddam minus ambiguum reperimus: ubi enim de febribus sermonem habet (3); quæ a depravatis admodum humoribus accenduntur, parvas sub initia pustulas dicit in corpore uni-

(1) *Febr. Mal. Puncticul. Sect. 1. Aphor. 7.*

(2) *Epidemior. lib. 7. Num. 87, 91, 112; & in eodem libro Num. 51 de Andrea mentio fit, qui cutem habebat pruriginosis, & calidis pustulis affectam.*

(3) *V. Tom. 1. De Re Medica. l. 5. c. 29. interprete J. B. MONTANO.*

universo, aut plerisque membris efflorescere, vibicibus aut culicum morfiunculis similes . . . aliquando igneas esse ac pruritum facere . . . consuevisse, si retrocesserint, perniciem asferre. hæc autem ex HERODOTO, ut reliqua, ibidem docet AETIUS. Ac de pustulis quidem iis, quæ nonnumquam instabiles appareant in febre pestilente, ad hunc modum loquitur AVICENNA (2): *Quandoque accidit cum ea borbor subalbida, & rubra, & quandoque est velocis apparitionis & occultationis.* ita scilicet papulæ designari videntur sudaminum similes, quas alibi auctor ipse *borbor spinosos* appellat (4). Ex quibus propterea locis verisimile fit, neque veteribus Medicis, qui Græciam, & Asiaticas regiones incoherent, acutas febres ex quadam specie miliarium prorsus ignotas fuisse. Verum hæc alii viderint accuratius, quæ dumtaxat indicare voluimus; atque ex ordine instituto ad reliqua progrediamur.

Superioribus annis quicumque in hanc urbem veniebant Itali, & inter eos quidam præcipue Medici, de miliari morbo ita frequenti apud nos, gravissimo, & sæpe funesto plane omnes mirabantur; cum eorum nemo sive in patria sua, sive in iis, quas

pera.

(2) Canon. Lib. 4. Fen. 1. Tract. 4. c. 2.

(4) Lib. 4. Fen. 1. Tract. 3. c. 2.

peragravisset, provinciis, quidquam tale audivisset. Alii etiam ex multis Italiae locis mihi per litteras affirmabant, vel nunquam in puerperis ejusmodi luem, tum maxime nostratibus infestam; vel cutaneas tantum papulas, easque benignas interdum se observasse. Verumtamen abhinc annis fere viginti ad me scribebat BARTHOL. CURTIUS, aliquas Mediolani se vidisse olim puerperas ex febre continua graviter laborantes cum exanthematis miliaceis; nec vero, quantum ipse meminisset, ex iis ullam e vita ereptam fuisse. Eodem propemodum tempore ZAMBECCARIUS mihi per epistolam nuntiabat de nobili Florentina muliere inopinatum eventum in puerperio, quæ scilicet ex miliari morbo periisset. Insuper abhinc aliquot annis auditione accepi, quamdam in Etruria feminam, itidem puerperam, ejusdemmodi malo gravissime afflictam fuisse, quæ tamen convaluisset. Utinam iis in locis, ubi nonnullum hujusce luis seminium casu, & fortuito exortum est, non reviviscat, nec late diffundatur, ac denique consistat, quemadmodum hic nobis infelici quodam fato evenit. Sed nostram calamitatem postea narrabimus: prius enim de aliis nationibus, quibus eadem jamdudum ingruit perniciēs, maximeque de Germanicis dicendum.

Pri-

Primus omnium GOTTOFREDUS WELSCHIUS, Medicinæ Professor Lipsiensis, anno 1655 libellum evulgavit (1) de maligna quadam febre, tamquam novo Puerperarum morbo, qui nempe a triennio grassabatur Lipsiæ, adeo communis mulieribus, quæ recens peperissent, ut pars earum vix decima incolumis curriculum puerperii absolveret: interim ægrotantes, cum remedium prope nullum iis prodesset, pleræque moriebantur. Hujusmodi morbum antea invisum, neque illis Medicis cognitum, Lipsienses feminæ *der friesel* appellabant, propterea quod a rubris exanthematis inæqualis facta cutis & aspera quamdam cum laneo panno verrucoso similitudinem haberet. a granis autem milii, quorum similes papulæ viderentur, desumpto nomine, febrem miliarem primus etiam WELSCHIUS id malum esse nuncupandum putavit: quod veluti geminum, vel *duplici ut plurimum facie* se ostenderet (2), *plerumque rubra, non raro alba; primum scilicet cum insigni ac intenso semper corporis calo-*

(1) Libelli inscriptio hæc est: *Historia Medica Novum Puerperarum Morbum continens* &c., quam partitus est Auctor in capita tria: in primo ideam morbi; in secundo vulgarem ejus curandi rationem; in tertio de natura, causis, & curatione sententiam suam exposuit: quæ omnia in Theses fere centum distributa, publicæ Disputationi, & doctorum hominum judicio subjecit die 20. April. 1655.

(2) V. Cap. 3. §. 18.



*calore, rubore, pruritu, & asperitate cutis duriuscula; alterum quoad calorem, pruritum juxta ac rubedinem remissius, & pusillis albicantibus pustulis, ichorem in se continentibus, conspicuum.* Itaque sub duplici hoc aspectu per annos amplius tres infestum solis a partu mulieribus, ac formidabile fuit: quamquam animadvertit Auctor (1) jam demum *unam alteramve non gravidam corripere eodem malo cœpisse.* Atque id postmodum in ea prænobili urbe utrique sexui familiare factum fuisse, qui GOTTFR. WELSCHIUM consecuti sunt, Medici tradiderunt. Porro hæc ipsa lues, quæ tum Lipsiensi propria & peculiaris esse civium videbatur, decursu temporis non modo Misniam, totumque Saxoniz tractum, sed longe lateque Germaniam, immo vero alias etiam regiones invasit. Apud GEORG. HIERON. WELSCHIUM (2) historiam legisse memini primiparæ mulieris, quæ Augustæ Vindelicorum, anno 1660, in acutam febrem ex suppressis lochiis incidit, cum rubore & asperitate cutis, summaque virium imbecillitate, ut ægrotantis jam desperata salus tertio morbi die ab omnibus haberetur; atque eadem revera paullo post occubuit. sed fe-

G

brem

(1) Cap. 3. §. 24.

(2) In Decade 1. Curation. &amp; Consilior. Medic. Curat. 2.

brem istam, Lipsiensi licet similem Auctor ipse agnosceret, improprie, ut mihi videtur, coccineam denominavit. Quam deinde progressionem hic morbus fecerit Augustæ Vindelicorum, ignari sumus. Nos quidem docet in opusculo quodam suo (1) LOCHNERUS, hanc novam, ut ipse vocat, Purpuram (2), quæ ante annos fere triginta Norimbergenfibus incognita erat, tandem apud eos apparuisse, benignam inter initia, atque annis insequentibus graviolem esse factam, & potissimum in puerperis ac vegetis virginitibus

(1) *Mungos Animalculum, & Radix descrip. Norimb. 1699.*

(2) Recentes quidam Scriptores, ceteroqui medicæ artis bene periti, febrem miliarem, atque adeo exanthemata ipsa, nuncupare Purpuram consueverunt, alteram videlicet rubram, alteramque albam. Hæc vero multis omnino incongruens, ne quid gravius dicam, appellatio videtur, nisi forte credimus albam extitisse quædam vetustis temporibus purpuram, quæ a PLUTARCHO memorata esse scribitur \*: sed istud demum, qualecumque fuerit, jam nimis valde exoletum est. Atque insuper animadvertere licet, jamdudum a Medicis Purpuræ nomen tum purpureis maculis, tum febris petechiali, inditum esse, & hætenus adhiberi. AUGENIUS, vir doctissimus, reposuit Purpuram, sic a majoribus dictam, in pestilentium febrium numero: *Ostava*, inquit, *febris purpura est, antiquis non incognita, in qua scilicet apparent maculæ quædam in totum corpus purpurascens*. V. PAULINI *Prælect. Marc. pag. 299.* Utinam JOH. HENR. SCHULZE, quem in græcis & latinis litteris bene versatum esse intelligo, inchoatum opus de barbaris ineptisque vocabulis, quæ in artem nostram irreperunt, aliquando perficere queat: laborem certe quidem sibi molestum & gravem, studiosis autem medicinæ pergratum, maximeque utilem suscepit.

\* V. REDII *Adnotationes in Dithirambum, etruscæ lingua Bacco in Toscana.*

nibus malignam, sæpissimeque mortiferam. Jam vero in urbe primaria Hungariæ Superioris, Pofonio, idem morbus pervagari cœpit. Etenim RAYGERUS (1) in observationibus scriptum reliquit, anno 1672 ad curandam puellam se arcessitum fuisse, quam continua febris vexabat cum exanthematis non rubris, sed albicante humore pellucido plenis, a collo ad genua usque diffusis. Plane insolitum RAYGERO visum est ægritudinis genus: verum ancilla, tum assidens ægrota, se ipsam aliquando incidisse in similem morbum testabatur; & quædam postea mulierculæ ad invisendam puellam, interea dum eadem convalescebat, venientes, talia se conspexisse in aliis exanthemata, & plerumque funesta, narrabant. Sed ipsemet frequenter ab illo tempore vidit RAYGERUS adjunctas febribus, natura petechialibus, pustulas translucidas, modo milii, modo pisi minoris magnitudine, interdum albas in modum variolarum; quibus eruptionem mollientibus major æstus febrilis antecedeat, anxietas pectoris, & cordis compressio. Hæc nimirum & alia tradidit Auctor in *Scholio*

G 2 ad

(1) CAROLUS RAYGERUS Pofoniensis, vir litteratus, & rei medicæ valde peritus, qui MELCHIORIS SEBIZII auditor fuit, & FRANCISCI SYLVII, obiit anno D. 1707, ætatis suæ sexagesimo sexto. V. hujus Auctoris Observationem in *Dec. 1. Ephemer. Med. Phys. German. An. 3. N. 281.*

ad *Observationem* 91 SPINDLERI, Pösonien-  
 sis quoque Medici, quippe qui multo ante  
 illum miliares pustulas in febribus animad-  
 vertit cum benignis, tum vero etiam ma-  
 lignis: namque infaustum mulieris casum an-  
 no 1648 peticulis affectæ commemorat, in  
 qua tribus horis priusquam ipsa mortem  
 obiret, aquosæ vesiculæ apparuerunt. Sub  
 finem proximi sæculi (ut ad Germanos re-  
 deam) cum Heidelbergæ commoraretur JOH.  
 CONR. BRUNNERUS (1), & Philippoburgum  
 profectus esset, ibi milites febre epidemica  
 peticulari, comitem habente pleuropneumo-  
 niam, afflicto invenit, quorum hi præser-  
 tim moriebantur, quibus miliares etiam ve-  
 siculæ superveniebant. Idemque de illustri-  
 bus Feminis duabus mentionem facit, quas  
 febris acerbissima corripuit Dusseldorpii: in  
 altera pustulæ rubicundæ; postea recurrente  
 morbo vesiculares prodierunt; eaque summis  
 molestiis diu conflictata præter omnium spem  
 convaleuit. Aquosæ & pellucentes, iterata  
 quoque eruptione, pustulæ fuerunt in alte-  
 ra muliere, quam morbi vehementia sustu-  
 lit. Atque ita novæ BRUNNERO visæ sunt  
 id genus pustulæ, quasi crySTALLINÆ, ut a ne-  
 mine adhuc memoratas fuisse suspicaretur.  
 Porro autem circiter annum 1717 in qui-  
 bus-

(1) V. *Miscellan. Nat. Cur. Dec. 3. An. 7. & 8.*

busdam Provinciis Brandenburgicis, & fere sexennio post Francofurti ad Moenum hæc lues grassari coepisse dicitur. Quo propemodum tempore, ut mihi postea scribebat LENTILIUS (1), facta est frequentissima in Tractu Wirtembergico (cum ante in Suevia perraro febris illa miliaris se ostendisset) eademque multis quidem masculis, præsertim vero puerperis infesta erat: quamquam rarius inde bienni spatio accidisse id malum significabat. In Palatinatu Rheni cum pervagatus jamdudum esset morbus, adhuc tamen ad finem usque anni 1727 Basileensibus quasi parcere civibus videbatur, ita ut JOH. RUD. ZUINGERUS per litteras certiores me fecerit in decursu quindecim annorum unicum hominem, eumque senem se vidisse acuta febre oppressum, cum albidis pustulis & pellucidis, qui altera morbi hebdomada decesserat. Tum ego ad ZUINGERUM rescribens vehementer optabam, ut patriæ suæ, in tanto ejusdem, aliarumque regionum communi periculo, nihil pejus in posterum eveniret: neque aliud quicquam ab eo scriptum, etsi magna expectatio mea esset, postea accepi. Huc autem ex iisdem, quas modo dixi, eximii viri litteris transferendum esse

G 3

lo.

(1) ROSINUS LENTILIUS DUCIS Wirtembergensis  
Consiliarius, & Archiater.

locum quemdam, & cum Lectoribus communicandum putavi: sic igitur ille: *A clarissimo BINNINGERO, qui fuit Principi Montisbelgardensi a Consiliis Medicis, intellexi febrim miliarem apud ipsos vulgarem fuisse, ejusque morbi ipsum multas habuisse observationes, quarum aliquas de scripto raptim nobis recitavit, quæ cum observationibus HAMILTONI admodum congruere videbantur. Eident Principi suo, alias podagrico, tunc in quamdam apoplexia speciem prolapsa, certe vesiculas miliares eum prædixisse audiui, & præsagio eventum respondisse. Atque ipse quidem animadversionibus suis mihi fidem fecit, se non incertas notas hujus morbi imminentis detrexisse. Sed magno patriæ suæ damno diem obiit hic Medicus arte insignis; de cujus scriptis, quid actum sit, compertum non habeo. Inter Observationes editas a BINNINGERO ejusdem Patre, nulla occurrit de febre miliari; quod magno argumento est, vel prætermissum esse morbum tunc temporis, vel nondum, ut postea, vulgatum. Hæc ZUINGERUS.*

Reliquum est, ut huiusce notitiam, & documenta quædam ex Britannica gente capiamus. Ac nostram imprimis sententiam confirmabat vir doctissimus & celeberrimus HANS SLOANE (1), cum in Consilio abhinc

(1) Eques Auratus, quondam Præses Regiæ Societ. Anglicanæ; Regis GEORGI II Archiater &c.

annis viginti ad nos dato, minime dubium sibi esse diceret, quin, experientes olim Medici cum in ceteris Europæ locis, tum in Anglia, morbum ejusmodi nonnumquam observavissent: qui tamen recenti ætate Britannos, perinde ut alias quasdam nationes, frequentius divexaret, ubi familiaris non modo, sed interdum epidemicus esset. Equidem in libro THOMÆ WILLISII, caput illud totum perlegens de *Putridis Puerperarum Febris*, quamdam mihi videor perniciosæ febris miliaris imaginem videre. Namque iis propemodum symptomatis memoratæ ab Auctore puerperæ affligebantur, quæ in nostratibus sæpenumero animadversa fuerunt; atque illarum per id temporis ægrotantium, ut aliquando nostrarum, pars maxima interibat. Quæ autem a WILLISIO symptomata designantur, præcipua hæc sunt: febris ut plurimum a rigore vel horrore initium ducebat; inde calor & sudor, qui, licet assiduus, nihil proderat omnino; lochia parce fluebant, vel suppressiebantur; inquietudo accedebat cum pervigilio; pulsus in statu morbi vehemens & citatus; cordis palpitatio; præcordiorum oppressio; frequens respiratio; suspiria; tinnitus aurium; capitis repletio; tendinum motus convulsivi; & circum viscera, velut in hystericis, mira distentio & inflatio: alias

stupor, & affectus comatosi; alias mentis commotiones & deliria; adeo ut humore praviſſimo, qui excerni debuiffet, in cerebrum & nervos irruente, tum viribus proſtratis, pulſuque debili & inæquali, ægrota in mortem præcipites agerentur. Porro idem Auctor de prænobili juvene, & venuſta muliere narrat, quæ a facili partu ſatis bene ſe habere ad ſextum uſque diem perrexit: nihilominus die ſeptimo rigor eam corripuit, & febricula, cum lochiis imminutis; decimo increbuit febris, poſteraque nocte ſomnus vix ullus: mane inſequentis diei aperte delirabat; ſupprimebantur uteri purgamenta; horrebat corpus, & concutiebatur; tendines in carpiſ convellebantur, ut percipi pulſus haud facile poſſet, qui debilis erat & creberrimus: interim datis pharmacis & melius pulſabat arteria, & multus ſudor promovebatur, ita ut levis ſaltem aliqua ſalutis ſpes ſubfulgeret: ſed tamen paucis poſt horis ægrota elanguit, alvum copioſe deſecit, hinc plane reſolutis viribus conſumpta eſt. Atqui huiusmodi caſus funeſti hic etiam clariffimis & juvenibus feminis aliquoties inciderunt. Nullo quidem loco puſtulas commemorat WILLISIVS, ſed maculas in quibusdam ſaltem mulieribus purpureas. ubi vero acutum morbum exponit nobiliſſimæ puerperæ



peræ, quæ octavo die decessit, præter alia symptomata, de hisce peculiaribus meminit, qualia nostris in febribus miliaris observata sunt: *Palpebris, inquit, obductis, cum sonitu & rinnitu in toto capite mille phantasmata incurfabant . . . aliquando cum primum dormire cœperat, statim perterrita, & in præcordiis aggravata expèrgiscebatur. . . videbatur sui capitis magnitudo adaucta: quod simili ritu fit ac cum pes stupore correptus se ipso longe major persentiri videtur: tum illud subjungit, quod peculiariter morbi naturam indicare potest, nempe Stuporem in toto corpore pungitivum.* Ceterum quod aliquarum dumtaxat puerperarum cutis interfecta esset maculis; utique scimus in febribus, vi sua & essentia peticularibus, aut miliaris, aliquando evenire, ut efflorescentia quædam perexigua, & sensum propè fugiens, immo nulla prorsus appareat: & mors quidem ipsa in vehementi febre miliaris nonnumquam obtingit, priusquam pustulæ erumpere potuerunt. Deinde comperit habemus maculas, vel exanthemata interdum sub exitu morbi prodire; aut etiam, cum initio peticulæ se ostenderint, miliares inde papulas exoriri. Quapropter nisi de tanto viro, eodemque solerti Philosopho, atque Anatomico loqueremur, quantus profecto

fecto fuit WILLISIUS, dubitandum nobis esset, num ægrotantium cuti observandæ, & exanthematis quibusque discernendis parem ipse ac rebus ceteris, diligentiam adhibuisset. Enimvero VALLESIUS, ut alio loco diximus, & JOH. LANGIUS, & BALLONIUS (1) vel miliaria ab HIPPOCRATE memoratas aspredines, quod minus consideraverint, a vulgaribus maculis, sive peticulis nihil differre putaverunt. Ad summam pleræque febres illæ puerperarum atrocissimæ, sicut a WILLISIO expositæ sunt, natura peticulares censeantur, per me licet; sed morem præcipue miliarium, meo judicio, tenebant. Quamquam enim utramque inter speciem magna cognatio sit, miliaris tamen febris quasdam proprietates habet, magis fraudulenta, & sæpe nobis terribilior visa est.

Jam

(1) Id in primis de BALLONIO mirari licet, quippe qui cutaneas eruptiones, ac pustulas, toto ægrotantium corpore diffusas, interdum ipse viderit in febribus tertianis, & in quibusdam continuis nec malignis, videlicet ab æstu & fervore sanguinis excitatas; idemque de aliis meminerit febribus, quas comitarentur ejusmodi pustulæ, ubi quid *cacoethus* inesset, proptereaque suspectas esse tradiderit. Hæc autem omnia cum observasset acutissimus, atque optimus interpretes HIPPOCRATIS, cujus multa quidem involuta, & obscura diligenter explanavit; quid est quod asperitatem cutis miliaceam ad peticularem affectionem retulit? V. *Anticoris lib. 2. Consilior. Medic. in Comment. ad Hist. 5.* ubi etiam LANGII peculiaris locus, qui ad hanc rem pertinet, descriptus invenitur.

Jam sedulus ille medicinalium rerum observator, qui proxime WILLISTUM consequutus est, SYDENHAMUS, de miliaribus pustulis mentionem fecit in commentariolo *De Nova Febris Ingressu*. Hæc scilicet febris in decursu anni 1684 Londinensibus infesta fuit civibus, cum proximo superiore anno longè gravior atque epidemica in aliis Angliæ locis exstitisset. sæpenumero peticulæ, aut maculæ purpureæ, interdum miliares papulæ, morbillis non valde absimiles, in cute efflorescebant: atque hujusmodi exanthemata, licet ipsius vi morbi nonnumquam erumpèrent, sæpius a calido regimine, & abusu cardiacorum, excitabantur, ut idem Auctor existimavit. Ab eo tempore febres acutæ miliares, quæ propriè sic appellantur, in Britannia frèquentiores fuisse dicuntur; de quibus nihil porro littèris consignatum a SYDENHAMIO accepimus, cum is desinente anno 1689 e vivis excesserit. MORTONUS inde aquosas commemoravit vesiculas miliares, sed eas tantummodo, quæ media variolarum spatia occuparent, ab aliis etiam Medicis adnotatas. Ille autem ad classem morborum, qui vocari solent inflammatorii, cum variolosas non solum, & morbillosas, sed miliares quoque febres referret; de hisce & reliquis ex inflammatio-

ne affectibus scripturum se aliquando sperabat, si DEUS *vitam & otium dedisset*; quemadmodum ipse declaravit in *Præfatione* ad librum *De Febris Inflammatoriis Universalibus*. num quid ejusmodi scriptum MORTONUS reliquerit, nescimus: etenim anno 1698 sub finem mensis Augusti mortem obivit. Tandem vero HAMILTONUS cum plurium spatio annorum observationes collegisset, *de Febri Miliari Tractatum* illum confecit, atque in lucem emisit, qui unus de hoc argumento versatus est diu in manibus Medicorum. nam deinde Germani quidam, ETTMULLERUM (1) subsequenti, de morbi ejusdem natura, & curandi ratione accurate disseruerunt. Et HAMILTONUM quidem ipsum fuisse multi existimarunt, qui febres miliares cognovisset omnium primus in Anglia. Sed tamen in eo, quod supra citavimus, doctissimi SLOANE ad nos Consilio hæc plane verba leguntur: *Mibi*, inquit, *a Cl. BERNARDO* (2), *per celebri Londinensi Practico*

(1) Hic scilicet auctor multo ante HAMILTONUM de Purpura, seu Febre Miliari, sed breviter scripsit nonnulla, quæ suis de Medicina Practica operibus inseruit.

(2) Illum videlicet eundem esse arbitror CAROLUM BERNARDUM, quem propter summam eruditionem atque experientiam tum professionis, tum patriæ suæ decus & ornamentum fuisse dicit FREINDIUS in *Historia Medicinæ*: ubi etiam BERNARDI judicium de veteri & nova Chirurgia, perite eleganterque ipsius verbis expellum descripsit.

*Hico, plures ante annos monstrata* [ febris miliaris ] HAMILTONO a me ipso primum indigitata fuit . Hoc præterivit in Præfatione utriusque Tractatus sui (1) HAMILTONUS ; tantum significavit, statim ut manuscriptum codicem Typographo tradidisset, illud sibi innotuisse singulare caput *de Febre Miliari Puerperarum*, quod in Collegio Practico ETTMULLERI inveniretur . Nihil autem mirum videri debet, ab auctore Anglo commemoratum non esse GOTTOF. WELSCHII libellum (2), extra Germaniam vix cognitum, quippe cujus per pauca in publicum prodiissent exemplaria, neque alia deinde, quod sciam, ab anno 1655. ejusdem editio facta esset ; ita ut in transalpinis urbibus cum sæpe olim perquirendum exemplar curassem, in quadam denique taberna libraria fortuito inventum sit . De MERCKLINO potius mirari licet, Norimbergenſi Medico, quod in *Lindenjo Renovato*, ubi alterum denunciatur opusculum WELSCHII *de Lethalium Vulnerum Judici*o, alterum *de Novo Puerperarum Morbo* prætermiſſum fuerit : cum alioqui scripta, quæ-

(1) Simul enim Auctoris Tractatus duo prodierunt ; *Prior de Præceps Regulis* ; *Alter de Febre Miliari*. Londini 1710. Ulmæ 1712.

(2) Neque ETTMULLERUS ipse de opusculo civis sui, atque, ut arbitror, præceptoris WELSCHII mentionem fecit, ideo fortasse quod brevem de miliari febre sermonem instituit.

quæcumque noverit, in exteris & longinquis locis edita, ad Lindenianum Indicem MERCKLINUS adjecerit. Sed mittamus hæc, quæ ad historiam febrium miliarium parvi momenti sunt: atque etiam satis exterarum regiones pervagati, nunc tandem ad subalpinam, patriamque nostram veniamus.

Anni sunt amplius duo & triginta, cum Augustæ Taurinorum mihi una cum aliis Medicis primum contigit, ut acutam febrem miliarem in quâdam nobili Virgine observarem. præcipua, quæ reminisci possum, hæc erant symptomata: acerbis lateris dolor; difficilis respiratio; pulsus valde concitatus; assidua non modo vigilia, sed etiam corporis diu noctuque immoderata jactatio; ut in summo vitæ periculo ægrota verari ad decimum usque diem videretur: tum vero pustularum eruptio, limpidum humorem continentium, & ea quidem ex improvviso facta est, nobis nihil tale cogitantibus: postea febris, & symptomata paulatim omnia remiserunt: denique adolescentula, non sine multorum admiratione, convaleuit; atque etiamnum vivere hanc illustrem optimamque feminam auditione accipi. Biennio post unus ex iis, quos modo dicebam, Medicis, ad curandam mulierem accitus fuit, atrocissimo id genus morbo

la-

laborantem, quæ nullis tamen remediis adjuvari, neque instantem mortem effugere potuit. Porro alius quidam medicæ artis bene peritus, atque ingenuus vir, certior me faciebat de miliari febre, quæ item letalis fuisset juveni puerperæ, triennio prius quam casus ille ante memoratus nobili Virgini obtigisset. Jam vero insequentibus annis identidem aliquæ a partu mulieres hac perniciofa febre corripiebantur; ac pedetentim eadem lues magno omnium terrore percrebuit. etenim solis aliquandiu puerperis, maximeque illustribus matronis, infesta fuit, adeo ut nonnullæ etiam, cum salutis non exigua spes præluxisset, miserabiliter occubuerint: deinde plures alias promiscue, nec minore feritate invadere cœpit, atque perrexit. Quapropter afflictæ conjuges, dum uterum gerebant, multoque magis florente ætate nobiles, quam ceteræ, pariendi laborem, & quemcumque cruciatum parvi facientes, illud unum horribile malum, quippe quod sibi facile eventurum singulæ putarent, cum tristitia & angore dies noctesque animo agitare solebant. Ac melior quidem eorum hominum videbatur conditio, qui pestilentia ipsa semel affecti fuissent. nam de qualibet peste illud tritum & vulgare est, quod specialiter de Attica prodidit

dit THUCYCIDES: a ceteris, inquit, omnibus beati dicebantur qui evasisent, præcipue quod quemquam morbus iterum corripere solitus non esset, saltem non extingueret. ex miliari autem febris recreatæ mulieres idem subire se periculum ex altero puerperio prænoscebant, earum scilicet exemplo edoctæ, quæ denuo hanc luem contraxerant, unde etiam ex his aliquæ diem obierant. Sed progressu temporis communem utrique sexui se morbus ostendit, pueris, adolescentibus, maturâ ætate, nonnumquam provecta hominibus: id quod feminis uterum gerentibus, ut in communi calamitate, solatium afferre potuisset, nisi tum insuper timendum sibi esse, vel extra graviditatem, intellexissent: tametsi a prægnatione & partu sunt illæ ad morbum procliviores. Fortunata quidem in tali rerum statu censebatur plebecula, malo huic terribili longe minus obnoxia; adeo ut in Taurinensi Nosocomio, ubi parituris mulieribus hospitium jamdiu est constitutum, earum adhuc nulla incidisse in malignam febrem miliarem diceretur. Tanti enimvero momenti est ad valetudinem tuendam simplicioris victus ratio, & certa quædam temperatura & habitudo corporum; ut eadem  
prop-



propterea non ita facile a morbiferis quibusdam causis lædantur.

Quæ autem per aliquod temporis spatium propria hujusce urbis, & peculiaris habitata fuit calamitas, sensim Pedemontanam regionem longe lateque pervasit. Etenim abhinc annos viginti cum ex provincialibus Medicis quærerem, quidnam sibi cognitum perspectumque effet de omni genere febrium miliarium; alii tantummodo benignas in pueris, & adolescentibus; alii in quaque ætate nonnullas continuas, fere putridas, cum veribus conjunctas se observasse narrabant. Deinde vero nobis identidem nuntii afferebantur de miliaribus febribus, quæ ubi locorum perniciosæ nunquam antea, vel admodum raro inciderant, tales jam aliquoties, aut sæpius, apparuissent: ita ut pauci denique Pedemontani tractus inveniantur, ad quos citius aut serius non idem malum permanerit. Sed tamen haud pari feritate ac frequentia provincias, urbemque nostram continenter hic morbus affligit; cujus etiam apud Germanicam Gentem vicissitudines quæ-

H dam

(1) Præter alia, quæ olim de febre miliari nobiscum communicavit FRID. HOFFMANNUS, illud præsertim expressum eisdem ipsius verbis hic adnotamus. *Epidemicæ, inquit, rarius quidem grassari suevit; quandoque tamen post insolitam nimis fervidam æstatem, vel tepidam hieme constitutionem aeris, quam pluviosa & frigida diuturna excipiat tempestas. populares habet circuitus.*

dam sunt (1); ut illud plane insolens censeretur, quod supra ex GOTTOFR. WELSCHIO tradidimus, per triennium adeo communem, & mortiferam puerperis Liplienfibus miliarem luem exstitisse (1). Vertente quidem anno 1726 magnam hominum stragem fuisse in Thuringia, & Francofurti ad Moenum nos quondam certiores fecit HOFFMANNUS. In Tractu Wirtenbergenfi (ut alibi diximus auctore LENTILIO) cum aliquandiu grassatus esset morbus, idemque multis funestus, deinde tamen per biennium rarius interveniebat. Ac febrium petechialium similis ratio est, quæ scilicet in fatalia quædam tempora incidere videntur, & interim, ad earum morem quod attinet, inordinate, vel gradatim decedunt, aut increbescunt. sic docet LOEWIUS in *Constitutione Epidemica Sempronienfi An. 1704, mense Februario valde benignas fuisse petechias, Martio peiores, Aprili pessimas*. Item variolæ & morbilli, & aliæ præterea ægritudines, siue ob evidentes causas, siue absconditas, diverso gradu & circuitu humanum genus vexare solent. Ut autem ad

no-

(2) Ubi morbos diversi generis nominatim exponit ADOLPHUS, Lipsiæ grassantes per annum 1720 a Junio mense ad Decembrem, nullam de febribus miliaris mentionem facit; quod sane mirum videtur. V. *Acta Acad. Nat. Cur. Vol. 1, Obs. 1.*

nostrates redeam febres miliaceas, hæ modo plures, modo pauciores obveniunt; aliæ omnino gravissimæ, aliæ minus molestæ ac periculosæ, quin etiam aliquæ ita mites sunt, & malorum symptomatum expertes, ut vitæ discrimen afferre penitus nullum videantur. quamquam ne his quidem fidere sollertes expertique Medici consueverunt, usque dum procedentis morbi, non raro fallacis, rationem & viam intento animo persequuti, revera salutarem exitum fore cognoverint (1). Ceterum ex eo genere febrium miliarium, quæ gravissimæ sunt ac perniciosæ, prudenter delectis & opportune datis remediis, maximeque illius egregiæ curatricis Naturæ opera, non pauci ægrotautes, aliquando etiam ad extremum perducti, mirabiliter ab imminenti interitus periculo vindicantur.

Quo autem luctuoso tempore febrem miliarem in hac urbe infestam illustribus præfertim matronis, quæ recens peperissent,

H. 2

ac

(1) Huc spectare potissimum videtur, quod BALLONIUS admonet *Epidemior. lib. 2. Perseverante*, inquit, *febre licet miti non ita securos esse oportet, quin semper aliquid sinistri pertimescamus, ut omni nos calumnia liberemur: multa enim bonos Medicos latent; id quod GALENUS Comment. in lib. Prorrhet abunde demonstravit. Atque hæc quidem providentia ægrotis maxime utilis est: namque in his percurandis longe majorem diligentiam operamque ponunt Medici, ubi morbum, aspectu lenem, temporis decursu ingravescere adhuc polle animadverterint.*

ac sæpe mortiferam fuisse diximus; jussu REGIS Augustissimi aliquoties convocati sunt præstantes in arte medica viri, ut suas inter se observationes communicarent, ac de regimine gravidarum mulierum, delectuque remediorum in curandis puerperis judicium suum proferrent. simul incisiones cadaverum fieri cœperunt, quæ postmodum, in civēs feminas propagata lue, multo frequentius institutæ sunt. ego nonnullis primum interfui; deinde vir (1) plane idoneus tali ac tanto muneri obeundo præpositus fuit, qui de singulis rebus diligenter observatis retulit, suamque sententiam exposuit. Ab exteris præterea Medicis celeberrimis peti- tum fuit consilium, ut in eo casu acerbissimo nihil esset prætermis- sum, quod publicæ salutis profuturum videretur. Hæc videlicet annis abhinc viginti peracta sunt. Itaque per id temporis, & deinceps multa colle- gi, quæ ad idem argumentum pertinerent, sive in curandis ægrotis adnotata, sive à Scriptoribus, atque à nostratibus Medicis desumpta, qui me officiose observationum suarum participem facere solebant. sed eas promiscue res omnes, prout occasio data erat, una cum animadversionibus quibus- dam

(1) Cl. BIANCHI Primarius tum Professor Anatomicus in Regia Taurinensi Academia, nunc etiam Magistratus Medici Princeps, vulgo *Capo del Protomedicato*.

dam meis, in adversaria contuli; quibus accurate recognoscendis, & in ordinem collocandis hactenus tantum otii, quantum esset satis, habere non potui. Nunc autem mihi visum est de miliarium febrium antiquitate & progressu, qui recenti ætate maximus, ac prope incredibilis fuit, jamdiu inchoatam hanc dissertationem, & denique absolutam, emitte.

---

IMPRIMATUR.

*Vicarius Generalis S. Officii.*

*V. C. Guidetti P. & R.*

*Se ne permette la Stampa.*

*Morezzo per la Gran Cancelleria.*

## E R R A T A.

*Pag. 20. lin. 18. pane leg. pæne. p. 37. l. 26. ac leg. ut  
p. 38. l. 1. sustulerit leg. penitus sustulerit. p. 51. l. 12.  
inferiore leg. interiore. p. 52 l. 13. Germania leg. Ger-  
maniam. p. 58. l. 2. granis leg. maculis. p. 59. l. 23.  
exortis leg. exortæ p. 70. l. 26. Ananbergenses leg. An-  
nabergenses. p. 77. l. 4 Olyssipona leg. Olyssipone; l. 17.  
generis pustulas leg. generis esse pustulas.*

*Quæ reliqua sunt menda levissima, Lector ipse corrigat.*